

REVELATION

Aevo'i jajivare jöhoje.

1 ¹ Aveho urimo subivahuadoho Iesu Kerisohu huruohoromo röjahuijade jöhoje. Ëröjahuijade jöho God-ro Iesu bojamadeje huro hesi mu vaejaharue aribövioho röjahuijago noro garomo uvoröhego: God-ro nimo'ego majae ijönö ëhi ëhi jïë'e muohuro nosi örire rue'ie'ajëjo. Ëijönö rueröhe mu hesi jöho Kerisoro nosi örire röjahui'i nimoromo hesi aneraho uavamu huro barueromo John God-are mu vaejahaje aho röjahijadeje. ² God-hu jövade jö Iesu Kerisohu mae röjahijamu John-hu gavadoho aho'o huhu mae jajivo barëjadoho aviaje. ³ Ae rahu ave surire jö adahë'oho o ave God-are örire jioromo rovade jö heromo rabe rabe jajivadoho ëho ejahë'oho iae huë mae bae'a'anue maja börömoho dunovë'ëro.

John-hu God-are ekaresiae amo göre göre raromaruoho jejëmijade jöhoje.

⁴ O asë'e ekaresiae aho'obëhe 7 Asia sa'a hesi uhure amo göre göre raromobe rovarujohumë John naro jemesi örire jejëmije. Na nege God mami'e ëhi jïë'ëro hiemu hibe rovë'ëro jaruvohu'o ëhi hijaje röhu ijönö ëhi gemu hiemu hibe va'iröhe ë ahuro jemë huë baeromo ajëmijago maro raromo'irarijago. O na nege God-hu döre hijaje röho hesi nuninö raromaruë Aru'ahe aho'obëhe 7 ëho jabu'o ëhi gemuho jemesi örire ajëmi'iröhego. ⁵ O na nege Iesu Kerisoro Vavu hesi jöhuremu ma-mae majahuibe rovë'ëro guomoromo huro aevo'ioho ri'öromo hijë'ëro a masijo ioro'ioro ave sa'a muebejaruoho iosirëmiromo böröme namiromo muebejëvaje ë aho hu'o ëhi gemuho ajëmi'iröhego.

Keriso hu mabëheje. Huro nosi örire uehorovavujëro jïë'ëro hesi köho otehoromo guomorovoromo ëhuro nosi sisëho u'ovahuadeje. ⁶ U'ovahuoromo ajamuiromo nosi ihoho döro bamahuamu ëhuro no masije riravoromo priest muoho baejë'e javue noro Keriso-are Böröme o Vavue God-are muoho vaenövoröhëni. Ëhi ajamuijë'ego ëhuni uvo'ejo: Hesi ihoho gemu börömoho höjo. Daruge aho'o hesiriremu höjo. Ae aho'obëhe no ëhi uvemu uvobe va'ejarëjo. Iae mae.

⁷Gare. Iae hu suehu'o gemu mae ruvebi'ië'e. Ruvebi'iramu ae aho'obëhe röhu hu anare aribövioho jabu'o nunëro garuomole'e. Garomo sa'ae aho'obëhe nierusuburu'e bamoruomole'e. Ejöho iae mae. Iae ëhi jio'ë'e.

⁸Bada God-ro uëve: Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Mami'e jiohe rovadoho röhu avevejö'oho ëhi jioromo röhu ijönöhu'o ëhi jiohe va'iröhe aho daruge aho'o jië'e aho God-ro ëhi uëve.

John-hu nia'ovo'iraeromo Keriso gavade jöhoje.

⁹Röhu John na jemesi agane gemuoho jeve. Jemë'o na'o Iesuare ae gemuohuro javuë'ëro na jemë'o havoromo huë vavaene baeromo God-are aharire jiajëro hesi ajoho baeromo baberumi namijajeje. Na motumotu hesi ihe Patmos ë remë'ejö rabëni God-hu jövade jö Iesuhu ma röjahuijadoho naehu majëhijajohuni. ¹⁰Naro Patmos sa'are hiromo hura börömoho Bada uehorovarue majaho rovamu iae God-are Aru'ahohuro rumorovevoromo uehore bojemamu hi'i hejodeje nasi dejonö jö'o ögohuro hëgö va'ëne ma-darugo'o rovavamu. ¹¹Jö'o ögohuro ma-darugo'o rueromo uevavohijo: Mue gö gö ga'amanuoho suri surioro jajivonëjo. Jajivoromo ekaresiae aho'obëhe 7 jabesi öroro nugö'önego adahego hebe va'irarëjo. Ephesus amo rajo ekaresiae Smyrna amo raje Pergamum amo raje Thyatira amo raje Sardis amo raje Philadelphia amo raje Laodicea amo raje ëho jabumëro adahobe hebe va'irarëjo.

¹²Ëhi jövamu hejë'i hunuorovodeje rahuhu na'o jöe jövajoho ga'i. E'i gavodeje iro bahijarue gije aho'obëhe 7 gold-ehu avoho'amë'oho ë momorö'öjamu ¹³o iro bahijarue gije riravaje ririre a ma va'ëne aho niögu ëgobövi ba'amamu hörohu'o utahë'e gold-ehu avohë'e hisioho vinebire muoho taemë'e ëhi namijamu. ¹⁴Ëa hesi simanohu'o simano uohu'o ajivoromo sa buse jahanovë'e jiohijo. Hesi nunoho vënëro höduvanovohijo. ¹⁵Hesi höroho ajanie vënëro ravoromo ajivanovohijo. Huhu jö jövajoho jövëro ruomanovoromo ma-darugo'o uvavohijo. ¹⁶Hesi övo mare jije aho'obëhe 7 jio'amohijo. Hesi jö'ore kaejö ëge anie ruë jio vië jië'e anio ma-ma'e jiohijo. Hesi nu ano'oho majaehu höröromo ajivego gavaruëhi ëhi ajivë'e jiohijo. ¹⁷Ajivë'e jiamu gavë'i juhuonivoromo hesi hörü'ere bejevoromo hesi bëhire ae guomë'ohuro raromanovodeje. Raromamu hesi övo mahuro nasi sinore bamehoromo uevadeje: Nadi juhuonivëjo. Na aevo'i jevadoho röhu ijo tugoho'i jevo'ajëjo. ¹⁸Na birivoromo hijaje ae jevajëjo. Urimo na guomevade höjo. Röhu gevëjo. Na ioro'ioremu hiemu hijajëjo. Ioro'ioremu hiromo darugoho baejë'ëro ëhu'ëro naehu uëvë'ohuro aëro vuovoromo vuovë'e ariböviehu va'o raromaruire ë va'o raromarue höjo. O bogo uëvë'oho bogajo. Na ëhi jië'e eni jevë'e ae jevajëjo. ¹⁹Ëhuni jaruvo jiaje muohu'o ijönö rueröhe muohu'o jaehu ga'amanuoho ëho jajivo'amonëjo. ²⁰Röhu jije aho'obëhe

7 nasi övo mare jio'amamu gavane hesi jö subivahadoho o gold-ehu avoho'amë'e iro gije aho'obëhe 7 ga'amane ë hesi jö subivahadoho ë jöe niö'i jabesi bëhoho ma-sama'e huruoho majahi'ië'ajëjo. Jije aho'obëhe 7 jabesi bëhoho ekaresiae 7 jabumë muebejëvobe va'arue anerae jio'amajëjo. O iro gije 7 jabesi bëhoho ë ekaresia 7-ho jiobe va'ajëjo.

**Iesuhu Ephesus amore raromarue ekaresia
jabesi örire nugö'öjade jöhoje.**

2 ¹Röhu Ephesus amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Nörö böröme namiromo jije 7 övo mare ma'eno'amë'e iro gije 7 jabesi ririre hi juvaje aho nöröro jöe majëhi'irögoro ë'ajëjo. Uënëjo: Nöröro uvajëjo: ²Jemesi muoho iae na gëvajëjo. I'u'e mu masijoho u'urume vae'ego gëvajëjo. O sisë aribövioho jemëro bogo ma-nunëremuoho gë'i ahëvo'ego gëvajëjo. Aëro jemë sarerëmiromo uëvare höjo: No apostle javuajë uëvaroho jemëro jabesi muoho mevoromo gëvarije höjo jabumë bogo apostle maehu jëvamu. ³U'urume vaejë'e jëvajëjo. Nasi jöëni vavaeni böröme baejë'e jëvajëjo röhu bogo u'uvëvë'e höjo. ⁴Ëhi jëvohijajo röhu avehuremu gë'ihöromo na bijönegajëjo. Rabëni jemë aevo'i rajehi avoho'ego gënövodëhioho avevejö'oho bogo ëhioho ë'ego gëvajëjo. ⁵Urimo dë vövöbajo'e aho'o rajehinövarijoho avevejö'oho u'uhëhanovajoho ëho uehorovoromo sisëho vuonugo'i huotorovoromo urimo ë'onövarijëhi ëhi ë'onövorëjo. Bogo ëhi ë'ë'oho naro ö'oromo jemesi iro gijoho rori'o bava'ejöjo. Bogo huotorovoromo avoho rajehijë'oho iae na ëhi ë'ejöjo. ⁶Iae ëhi höjo röhu aviëhi ë'arujoho iae mae höjo. Nicolaus-are ijore ijore jijiharue aribövi jabesi mu sisë naehu bijönimajëhi jemë'o ëhi gemuoho bijönimaruje höjo.

⁷Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho Iesu naro ja ua'ejöjo a i'ovëvo'iröhe ije God-are mure namijaje hesi bajoho i'iranego. Ahia mino'ëjo.

**Iesuhu Smyrna amore raromarue ekaresia
jabesi örire nugö'öjade jöhoje.**

⁸O Smyrna amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Aevo'i jiadoho ijo tugoho'i jioröhe aho guomadoho röhu maho i'ovade aho nöröro jöe majëhi'irögoro ë'ajëjo. Nöröro uvajëjo: ⁹Jemesi huë vavaenoho iae na gëvajëjo. Jemë ave sa'a hesi mae sisë bogojëvajohu'o gëvajëjo. Röhu dë vövöbajo'o uhure bövi mae baejë'e jëvajëjo. Amo jemë agëvarue aribövi jabesi jö sisëho

ëhu'o gavajëjo. Jaburo uvarue höjo: No Jew raje javuajëjo röhu Jew rajehu God-are aribövi jiaruëhioho jabumë bogo ëhioho jio'i Satan-are aribövie jioruomajëjo. ¹⁰Jemë vi'ehe huë vavaene bae'ië'arujoho nadi juhuonivorëjo. Gahëjo. Iae Satan-ro ae uë'a'ajëjo jaburo jemë ae gö gö savoji gagore ba'amëvego huro jemesi dëho bijioho gëröhëro. Èhi'o'iramu huë vavaene baebe va'ojuvo majae ma-bisemu barë'iramu barëjëho'ajëjo. Röhu biririvemu biririvamu vuovëvë'iroho ioro'ioyemu raromo'irarije suvuoroho naro bojëmi'ejöjo ruahö'öjarijohuni.

¹¹Ae rahu ja God-are jö hejanue ae javë'o'ho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjë'o'ho sinoho guomavo'iramu ijönöho aru'ahoho bogo guomavoromo sisëroho va'i maro hi'a'anuëjo. Ahia mino'ëjo.

**Iesuhu Pergamum amore raromarue ekaresia
jabesi örire nugö'öjade jöhoje.**

¹²O Pergamum amore raromarue ekaresia jabu'o hiro mo muebejëvaje anera hesi öro ro jajivonego ekaresiae aho'o he'irarëjo. Jajivoromo uënëjo: Kaejö ëge anie ruë jio vië jië'e anio ma-ma'e jö'ore jië'e aho nöro ro jöe majëhi'ie'ajëjo. ¹³Vaevë'e diehi jië'e amore raromarujoho iae na gëvajëjo. Satan hu ë amore a böro me vaeromo muebejëvaje höjo. Èhi höjo röhu nasi ekaresia aribövioho jemëro biririvoromo nasi ihoho ma'enuarue höjo. Urimë'i Antipas-ro nasi jöho mae majëhijamu hegoro vo ë Satan-hu hijajire raromarue amo rajohuro hu anamu guomade höjo. Guomamu röhu jemëhu nasi örire mae uehorovevarijoho bogo vuonugarije höjo. ¹⁴Èhi höjo röhu avehuremu bogo maehu jio'i sisë höjo. Jasi ekaresia aribövie göëro göëro Balaam-hu mu sisë vaejadëhi ëhi gemuoho vaejarue höjo. Èhesi bëhoho urimë'i Balaam-ro a böro mo hesi ihe Balak röjahiromo uavade höjo: Jero ëhi'oromo Israel rajoho sarerëminego sisëro revo'irajo. Balaam-ro jö sisëho ëhi röjahijamu hegoro vo rue a böro mohuro ejahoromo Israel rajoho dinëmijamu jaburo God-are jöho ahoromo uvare höjo: Inöme gö gö aru'aho'e höromo rajahiromo mioho ë inömo inömhuni bahijëhoromo vituoho ue'ahoromo öëro jijihanovoroumade höjo. Balaam-ro ëhi jië'e mu sisëho röjahade höjo. ¹⁵Balaam-hu mu sisë urimo röjëhijadëhi jaruvoho ëhi jië'e mu sisëho Nicolaus-ro röjëhijego ae gö jemesirire raromaruohuro hesi ijore ijore jijihoromo mu sisë vaejarue höjo. Mu sisë vaejogo jemëro ma-raromoromo nunëremu gëvarue höjo. ¹⁶Èhi jië'e mu sisë ma-nunëremu gëvarujoho vuonugo'i ë mu sisëho ahëvohëjo. Bogo ahëvë'o'ho naro ma-burëro ö'ejöjo. Ö'oromo nasi jö'ore jiaje kaejöhö baeromo ë sisë ariböviohu'o muorovo'ejöjo.

¹⁷Ae rahu ja God-are jö hejanue ae javë'o'ho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'o ho naro suvuore bojami'ejöjo. Suvuoro hesi bëhoho urimë'i God-are ariböviehu a rumo'e sa'are jijihamu God-hu muebejëvoromo ö'idöre jiaje i i'imëmijadëhi naro ja ëhi muebejëvoromo gurihijë'e ö'idöre jiaje ioho i'imami'ejöjo i'iranego. Ö'idöre jiaje ioho i'imamiromo ajivë'e munëho bojami'ejöjo. Ëmunë hesi döre iho i'e jativë'e jio'a'ajëjo. Ëihoho jasi sivue ga'a'anuejo. A göho bogajo. Ahia mino'ëjo.

**Iesuhu Thyatira amore raromarue ekaresia
jabesi örire nugö'öjade jöhoje.**

¹⁸O Thyatira amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: God-are Harihe nunire vënehu höduvanovoromo hörure ajani vënehu ravoromo ajivanovaje aho nöröro jöe majëhi'i'ë'ajëjo. ¹⁹Iae na gavajoho jemë mu mae vaejaruje höjo. Jemë na'o a ioro'iorohu'o rajahuiromo na mae uehorovevoromo nasi muoho vaejehoromo muoho u'urume vaejë'i biririvaruje höjo. Urimoho mu mae ma-bisemu vaejarijoho jaruvoho börömo bëhe vaejaruje höjo. ²⁰Iae ëhi gavajëjo röhu avehuremu gë'ihöromo na bijönegajëjo. Magonahe gemu Jezebel-hu urimë'i hiromo mu sisë barovadëhi magonahe gemuëro jemë'o hiromo mu sisëho ëhi gemuoho barovaje höjo. Mu sisëho barovego jemëro bogo aho'i ma-nunëremu gavaruje höjo. Manunëremu gavego ë magonahohuro jemë'o hiromo sarerëmiromo uëvaje höjo: Na jö God-aro baeromo majëhijaje magonahe jevajëromo Iesu nasi mu vaejeharue aribövioho sareri sareri'e jöho röjëhiromo uëvaje höjo: A'o magonaho'o ëma sihamirovë'o ho iae mae höjo. O inöme gö gö aru'aho'e jio'amajëromo jabumëni bahijëhare mi ue'ahë'o ho iae mae höjo. Ëhi jiië'e sareri'e jöho majëhijego nasi aribövi ioro'iorohuro uvarue höjo: Hesi jöho mae höromo ejaharue höjo. ²¹Ëhi ë'ë'e höjo röhu Iesu naro bogo burëroho i'uoho bojami'i ma-muebejë'e jevajëjo huro uehoro sisëho vuonugo'i uehoro mae baeröhego. Röhu önö'e mu sisë röjëhijajoho vuonugo'iröhoho bijönimajëjo. ²²Bijönimë'ego ëhuni iae Iesu naro i'ue mana bojami'iramu guomo guome baeromo röhoremu raromo'ajëjo. Raromo'iramu ë magonahohu'o önö'e jijihaje aribövioho jabu'o ëhi vi'ehe böröme bae'a'aruëjo. Jabumë ë magonaho hesi jö ejaho'i bogo vuonugë'o ho ëhi jiië'e vi'ehi börömo ho bojemi'ejöjo. ²³O ë magonaho hesi ijore ijore jijiharue aboji harihu'o ho Iesu naro muo'amo'iramu vuovëvo'ajëjo. Vuovëvo'iramu gagorovo ekaresiae aho'obëhe amo göre göre uvobe va'oruomo'ajëjo: Nöröro ae aho'obëhe nosi simanoho dë vövöbajo'o ho mevavuo barëjaje höjo gö'i mae o sisë javuego. Mevavuo göromo nosi mu diehi vaejarue hesi manaho ëhi bojamui'ajëjo. Ekaresiaëro ëhi uehorovoruomo'ajëjo.

²⁴Röhu Thyatira amo rajo a ioro'ioroho jemëro ë magonaho hesi jö sisëho bogo ejaharuje höjo. O hesi ariböviehu uëvaruoho: Satan-are uhu jö hesi

bēhoho no baejaroho jemē'o baerē uēvaruoho jemē bogo ejēharuje hōjo. Bogo ejēharujohuni ēhuni Iesu naro jemesi ōrire ave jōho uē'iē'ajējo. Jemē mu bōrōme baejē'ego ē hesi dōroho muoho bogo gō'oho bojēmī'ejōjo. ²⁵Rōhu ē mu baejarijoho biririvoromo ma'enegro Iesu na ō'irōjo. ²⁶Ae rahu mu sisē ruahō'ōromo biririvoromo nasi mu ma'enobe va'ujuvo jasi maja barējē'oho naro ja daruge bojami'iramu sa'ae aho'o muebejēvo'anuejo. ²⁷Sa'ae gō gō muebejēvoromo aehu rama anoromo hahovaruēhi jero ēhi ha'itoho baeromo vōrō'o muebejēvo'anuejo. Naehu ēhi'oromo sa'ae gō gō muebejēvo'irodego nasi Vavuehu uevadēhi naro ja ēhi ua'ejōjo sa'ae gō gō vōrō'o muebejēvo'iranego. ²⁸Naro ēhi uaromo sisonu'e gavarue mujōru hesi ajoho bojami'ejōjo.

²⁹Ae rahu ja God-are jō hejanue ae javē'oho nasi Aru'ahehu ekaresia majēhibe rovaje jōho heromo avoho uehorovonējo. Ahia mino'ējo.

Iesuhu Sardis amore raromarue ekaresia jabesi ōrire nugō'ōjade jōhoje.

3 ¹O Sardis amore raromarue ekaresia jabu'o hiromo muebejēvaje anera hesi ōroro jajivonego ekaresiae aho'o he'irarējo. Bōrōme namiromo God-are Aru'ahe aho'obēhe 7 o jije aho'obēhe 7 baejē'e aho nōrōro jōe majēhi'iē'ajējo. Jemēhu mu vaejarujoho iae na gavajējo. Na gavajoho ae aho'obēhe uvoruomaje hōjo: Sardis ekaresiaho jemēro God-are daruge baeromo mae raromaruje hōjo. Jemesi jōho ēhi atarue hōjo. Rōhu jemē bogo ēhioho jēvo'i jemesi aru'ahoho God-are darugo rumo'ēro jīhē'ēro vuovēhē'e hōjo. ²Ēhuni ri'ō nune dadovohējo. Vēni duoroho'iē'ajoho mueberomo huego avoho ravo'irajo. Duoroho barējēho'ajējo. Na gavajoho nasi A Bōrōmoho God-ro uvaje hōjo: Jemesi muoho bogo maehu hōjo. ³Ēhuni Christian jō rabe majēhijamu hejarijoho avo'avoho uehorovoromo eromo uehoro sisēho vuonugohējo. Bogo ri'ō nuni dadovoromo avoho uehorovē'oho naro vajiohēro ō'ejōjo. Naehu ō'irode majaho bogo mae bogo ga'a'arujējo. ⁴Jemē ēhi jēvajējo rōhu jemesi Sardis amo raje ae gemu gemu jabesi niōgoho avo'avoho muebejē'ēro va'inumoho bogojīhājējo. Ēaribōvioho maēro jēvē'ēro ēhuni ajivē'e niōgoho io'amoromo na'o gemu mae jijihō'aruējo. ⁵Ae rahu biririvoromo mu sisē ruahō'ōjē'oho ajivē'e niōgoho ēhi ba'amo'anuejo. O jasi ihoho mae raromemu raromo'irōhe aribōvi jabesi surire jajivodoho na bogo mu'uvaho'ejōjo. Bogo mu'uvaho'i al' naro nasi Vavu hesi nunire o anera jabesi nunire namiromo jasi ihoho ma-samae majēhiromo uē'ejōjo: Ave aho nasi a maho hōjo.

⁶Ae rahu ja God-are jō hejanue ae javē'oho nasi Aru'ahehu ekaresia majēhibe rovaje jōho heromo avoho uehorovonējo. Ahia mino'ējo.

Iesuhu Philadelphia amore raromarue ekaresia jabesi ōrire nugō'ōjade jōhoje.

⁷O Philadelphia amore raromarue ekaresia jabu'o hiromo muebejēvaje anera hesi ōroro jajivonego ekaresiae aho'o he'irarējo. Jajivoromo

uënëjo: Bogo sisëho bogo sareri'oho jio'i ma-maëremu jiaje aho nöröro jöe majëhi'ië'ajëjo. David-hu böröme namiromo God-are öri ari'ere va'iröhe öroho muebejadëhi naro ëhi muebejaje höjo. Naehu öri jiovë'iroho ae göehu tugoho'iröhoho bogo eni höjo. O naehu tugohë'iroho ae göehu jiovo'iröhoho bogo eni höjo. Èhi jië'e a börömoho Iesu naro jöe majëhi'ië'ajëjo. ⁸Jemëhu mu vaejarujoho iae na gëvajëjo. Hehëjo. Naro mu öroho jemëni jiovëhë'e jevajëjo. Jiovëhë'ëro ae göehu tugohëho'iröhoho bogo eni höjo. Iae na gavajoho jemesi darugoho bogo bövioho jië'e jemëro nasi jöho ejehoromo nasi ihoho ae aho'o jabesi nunire huruoho majëhiromo uëvë'e jëvajëjo: Iae no Iesuare aribövie javuajëjo. ⁹Iae Satan-are ariböviohuro jemesi amore raromoromo uvoruomaje höjo: No Jew raje javuajëjo. Röhu Jew rajehu God-are aribövi jiaruëhioho jabumë bogo ëhioho God-are aribövioho jio'i Satan-are aribövie jioruomajëjo. Röhu hehëjo. Naro jabumë ruahö'öjëvo'iramu jaburo ö'oromo jemesi hörunö ague aho raromoromo gëromo uvoruomo'ajëjo: Jemë Iesuhu rajëhaje aribövie jëvajëjo. ¹⁰Nasi örohuni jemë u'urume vaejë'i biririvonövo'irarijego uëvode höjo. Èjöhö jemëro ma'enë'e jëvo'ego ëhuni naro jemë ma'enëgo'ejöjo. Ma'enëgo'iramu huë vavaene sa'ae dinö'e dinö'e rueromo ae aho'o jemesi dëre bijiohë'iroho jemë mae riravo'arujëjo. ¹¹Naehu rue'irode majaho dunovajëjo. Èhuni jemëhu baejarije mu maho nadi vuonugo'i ma-avoho mueberëjo ëhuro aho bogo iosirëmiromo jemesi suvuoroho baejëho'iröhe höjo. ¹²Ae rahu biririvoromo mu sisë ruahö'öjë'oho naro baejavoromo nasi A Böröme God-are osare bamavo'iramu bönunö'e bibivoromo namijanovo'anuëjo bogo ijoho rori'o va'iranëro. O nasi A Böröme God-are ihoho jasi sinore jajivaho'ejöjo ja hesiremu javoröhego. O nasi A Böröme God-are amo hesi ihoho sinore jajivaho'ejöjo. ÈJerusalem amo i'oho nasi A Böröme God-hu hijajire ö'idöre jioromo ruvebi'iröhoho ë amo hesi ihoho uavajëjo. O nasi iho i'ohu'o jasi sinore jajivaho'ejöjo.

¹³Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

**Iesuhu Laodicea amore raromarue ekaresia
jabesi örire nugö'öjade jöhoje.**

¹⁴O Laodicea amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: Mae jövaje aho na jevë'ego God-are jöho maro maro huruoho majëhijaje aho na jevajëjo. God-hu bövi bise'o bamadoho uevamu avoho'amode aho Iesu naro jöe majëhi'ië'ajëjo. ¹⁵Jemesi muoho iae na gëvajëjo. Jemë nanioho bogo nëgo avohaje höjo bogo bijönëgo avohaje höjo. Nëgo avoho'ibejajo o bijönëgo avoho'ibejajo na mae jevo'ibejajo. ¹⁶Röhu bogo nëgo avoho'i bogo bijönëgo avoho'i uehore ma-ririre jëvajöhuni ëhuni

sabonö'e ijuhö'öjévo'ejöjo. ¹⁷Jemëro uvaruje höjo: Nosi sivue bövie bise'e eni javuajéjo. Marohë'e mae javuajéjo. Böviëni bise'ënioho bogo vavaenoho baejarue höjo. Èhi ataruje höjo. Röhu jemesi uhuroho bogo èhioho jëvajújo. Jemë vaevë'e huë vavaeni'e bövi bise'o rumo'e nuni sisë'e ma-sinëremu raromarujéjo. Èhi jëvájoho èho bogo gavarujéjo. ¹⁸Èhuni ave öri avoho røjèhi'ie'ajoho avoho herëjo. Nasi gold ma-mabëhe ajivë'o ho nasiro imoromo jemesi ujuohorego marohë'e mae jëvo'irajo. Ajivë'e niögohoho nasiro imoromo io'amego sinëremu raromoromo a nunire javoji'e mu vaejarujoho tugohego mae jëvo'irajo. Nuni hesi osoho imoromo rue jemesi nuni maro buerovego jemesi simanoho ajivëvego avoho uehorovo'irarije höjo. ¹⁹Röhu naehu huë baejévaje aribövioho i'ue bojëmiromo avo'avoho røjèhijaje höjo sisëho vuonugo'i ma-avoho jijihoho'irarijeho. Èhuni jemëro nimo avohoromo huotorovoromo uehoro maemu baerëjo. ²⁰Hehëjo. Naro osare ö'irögoro amonö namiromo jemesi ojore ano'anovajújo. Ae rahu nasi huë heromo ojo jiovehë'o ho naro rumo ö'oromo ja'o hiromo gemuoro ioho i'ëjaréjo. ²¹Ae rahu biririvoromo mu sisë ruahö'öjè'o ho urimo naehu biririvoromo sisë ruahö'öromo ajiomoromo nasi Vavu hesi röho mare hu'o gemu mae hijë'ëro bövi bise'o muebejévájèhi naro èhi ja ua'iramu nasi röho mare ö'oromo na'o gemu mae hiromo na ajemiromo bövioho bise'o ho muebe'amo'anuëjo. ²²Ae rahu ja God-are jö hejanue ae javë'o ho nasi Aru'ahehu ekaresia majèhibe rovaje jöho heromo avoho uehorovonëjo. Ahia mino'ëjo.

Ö'idöre raromoromo God rajahiruomaje jöhoje.

4 ¹Èhi'amu naro ga'i gavodeje ö'idöre va'arue ojoho jiovo nugë'e jiamu. Jiovo nugë'e jiamu gagorovo hejode hëgöehu uvanovaje urimo jö majehijade ahuro röhu maho ma-darugo'o jöe majehiromo uevavamu: Avehuro rojomego ijonö mu diehi diehi jio'iröhoho na røjahijöjo. ²Èhi uevamu hejë'i God-are Aru'ahohuro na avohevoromo simanoho huotoveho barëjamu gavë'i naro ö'idöre muoho garomo gavodeje a börömehu hijaje röhoho ö'idöre jiamu. Èhi jio'ego ae gemu è hihijo. ³Hi'ego munë mabëhe gö gö kavuë'e ajivë'e jio'amoromo jinojino'irae'amajèhi hesi nu ano'o ho èhi jinojino'iraehijo. Röhu nuogëro röhoho numohijo. Munëhu mabëhe rövájèhi nuogohuro nomoromo èhi rövohijo. ⁴Èröho maho ririre jio'i a duvahe aho'obëhe 24 ruë numë gemu gemu röho mare raromo rova'oruomohijo. Ajivë'e niögohoho io'amoruomë'e a masijehu didi'aruëhi jjë'e bosöe gold-ehu avoho'amaroho simanore didi'oruomë'e èhi raromohijo. ⁵Röhu ririre röhore baderivo'ego varuru vajeri'e vae'i hijavohijo. O è röho ma hesi nuninö iro bunoho'irae'amadoho aho'obëhe 7 kavuo'amohijo. Èiro jabesi bëhoho God-are Aru'ahe aho'obëhe 7-hoje. ⁶O röho ma hesi nuninöho jovo e'u deri va'ëne ajivo avohë'e börömo böröme jiohijo.

O röhoho ririre jio'i God rajahijarue maje 4-ho ioni göre ioni göre dejonö nuninö ëhi riravo rova'oruomohijo. Nu ano'e ruë numë manunemu jioruehijo. ⁷Ëmajoho göho lion va'ëne jio'i göho cow ano'e harihu va'ëne jio'i göho ma-a nu ano'o va'ëne jio'i göho buruhehu hetejego gavaruëhi hesi nu ano'o ho ëhi jiohijo. ⁸God rajahijarue maje 4-ho gemu gemu vivoje aho'obëhe 6 6 jio'amohijo. Jabesi vivoju uhohu'o dönöhu'o sino haho'o ho aho'o ma-nunemu jio'amohijo. Röhu majae vahie sisone bogo vuonugë'e ma-jöe iemu ioromo uvarueje:

Bada God maemu maemu maemu jio'i daruge aho'obëhe hesirohemu höjo.

Mami'e jiobe rovadoho jaruvo jiajoho röhu ijönö jio'iröhoho höjo. ⁹God rajahijarue majohuro God ëhi ma-mabëhe rajahiromo jöho iarueje röho mare hiromo ioro'ioremu hibe va'aje a hesi ihoho dö maro jioröhego. ¹⁰Ëmaje 4-ehu ëhi rajahiromo jö ië'iroho rue a duvahoho aho'obëhe 24 jaburo röho mare hijaje a hesi nuninö ague aho raromoro hesi örire rajahijarueje hu ioro'ioremu hibe va'aje jië'ego. Rajahiromo jabesi a masijehu simanore didi'arue bosöho God-hu hijaje nuninö rideho bahijarueje. Bahiromo uavarueje:

¹¹ Nosi Bada God jero bövie bise'e bamane höjo.

Jero nimoromo avohë'ëro jio'amajëjo.

Ëhuro ja mae javë'ego iho börome aje aho'o daruge aho'o jasi gemu höjo.

Huhohë'e sure God-are Sheep Harihe Iesu gemuehu jiovo varijëne jöhoje.

5 ¹Ëhi'amu gavodeje röho mare hiromo muebejavuaje aho God-ro hesi övo mahuro huhohë'e suroho ma'enë'e jiamu. Ësuroho ruë jajivo vië jajivoromo huhohoromo sivaëro aho'o 7 ëmino'e suroho badihi taemo'amë'e jiohijo. ²O gavodeje darugo'e anerahuro ma-darugo'o uvamu: Rahu a börome javë'oho badihi taemo'amade sivahogoho'amoromo suri jiovo'iranoho eni javajëjo. ³Ëhi uvamu röhu ö'idöre sa'are sa'a uhure ëhi jië'e a böromoho nahoromo bogo mae bogo birohareje huhu ë suri jiovoromo adaho'iröhoho. ⁴Ëhi jië'e aho bogo birohamu ëhuni na sisë maro nivodeje. ⁵Nivamu a duvahe gemuëro uevadeje: Nadi nivo'i ave jöho hejëjo. A börome gemu iae eni jiajëjo. Lion-hu mi ioro'ioro iosirëmiromo darugo'e jiajëhi huro Judah rajo ioro'ioroho ëhi iosirëmiromo darugo ma'e höjo. David urimo hinövade a hesi ujo börome höjo. Ëahuro sisëho ruahö'öj'ëro sivae 7 goho'amoromo suri jiovë'oho hu eni höjo.

⁶Eni höjamu hejë'i gavodeje Sheep Harihoho namijamu. Mami'e aëro anamu guomë'ëro sinore batato'e jië'e ëhi namijamu. A duvahoho ruë numë riravo rova'ego God rajahijarue maje 4-ho ruë numë riravo rova'ego

ë Sheep Harihoho riri mare God-are röho ma hesi ririre namihijo.
 ËSheep-oho dane aho'obëhe 7 o nune aho'obëhe 7 ëhi jio'amohijo.
 Ënune aho'obëhe 7 jabesi bëhoho God-are Aru'ahe 7 sa'ae dinö'e dinö'e
 rëmö'øjadohoje. ⁷Amo ë Sheep Harihohuro rueromo röho mare hijaje aho
 God hesi övo mare jiaje suroho baehijo. ⁸Suroho bae'ego God rajahijarue
 maje 4-ho a duvahe aho'obëhe 24-ho jaburo Sheep Harihu hesi nuninö
 sa'are ague aho raromohijo. Jabumë gemu gemu gita övore ujuohë'e
 gold'e ramare ridi'e buejarue vëni u'oho ujuohë'e jiohijo. Ridi'e buejarue
 vëni u'i hesi bëhoho God-are ariböviehu hesi örire atarue jö'o ögohoje.
 Gita'o ramare vëni u'ohu'o ujuohë'e ague aho raromoromo ⁹jö i'oho
 ioromo uaruomohijo:

Ja maëremu javë'ëro ëhuni suri baeromo siva goho'amë'oho eni
 javajëjo.

Aëro anagamu jasi këho otehoromo guomane höjo. Guomoromo
 ëhuro ae ajëmijane höjo.

Agane gö gö huë gö gö sine gö gö sa'ae dinö'e dinö'e sisë'i
 raromaroho

jero guomoromo ëhuro imëvoromo baejëvoromo God-arinö rëmane
 höjo.

- ¹⁰ God-arinö rëmoromo jabesi ihoho döro bamëhamu
 ëhuro jabumë masije riravoromo priest muoho baejare höjo
 nosi A Böröme God hesi muoho vaenövoröhëni.
 Priest muoho baejë'ëro ijönö masije vaeromo
 sa'are ae muebejëvoruomomajëjo.

¹¹ Ëhi uaruomamu naro garomo hejodeje anerae aho'obëhe mae bogo
 adaho varijënoho uvoruomamu. God-are röho maho o God rajahijarue
 majoho o a duvahoho ëho ririro jio'amo'i ë aneraho aho'obëhe ruë
 numë raromo rova'oruomohijo. ¹² Raromo rova'oromo ma-darugo'o
 uvoruomohijo:

Anamu guomade Sheep-oho mae höjo.

Ëhu'ëro darugo maho inömo inöme aho'o uehoro maho vörö maho
 iho maho aji maho ma-hesiro gemu höjo.

Noro hu gemu rajahi'ëjarëjo.

¹³ Ëhi uvoruomamu hegorovo hejodeje God-hu bamade bövie bise'e
 ö'idöre sa'are sa'a uhure jovo gagore raromaruoho ëho jaburo aho'obëhe
 uvoruomavamu:

God röho mare hijaje ahu'o Sheep Harihohu'o

iho maho aji maho darugo maho ma-jabesiro gemu höjo.

Ëhi jiemu jiobe va'ië'ego jabumë gemu rajëhiemu rajëhinövo'ëjarëjo.

¹⁴ Ëhi uvoruomamu hegorovo rue God rajahijarue maje 4-ho jaburo
 uvoruomohijo: Ëjöho iae mae-ëjo. O a duvahoho jaburo sa'are ague aho
 raromoromo God'o Sheep Harihohu'o rajëhiruomohijo. jöhoje.

Suri badihi taemë'e siva dadovobe va'ade

6 ¹Ēhi'oruomamu gagorovo gavodeje surire sivae 7 badihijaroho gemu Sheep Harihohuro aevoromo gohamu. Gohamu evare hejodeje God rajahijarue maje 4-ho rōhu gemuēro varurehu anajēhi ēhi uvavamu: Rovējo. ²Rovējamu hegorovo ga'i gavodeje sino ajivë'e horse jiamu. Rōhu ě horse hesi dōre hijade aho pevae ma'enhijō. Mami'e muorovoromo ruahō'ōjē'ego bosō mabēhoho hesi simanore didi'ahohijō. Didi'aho'ego va'ohijō muorovoromo huro muorove aho'o ruahō'ō'amo'irōhēni.

³Ēhi'ego Sheep Harihehu urimo surire sivae gemu gohadoho rōhu number 2-oho gohohijō. Jiovamu evare hejodeje God rajahijaje majo gōhuro uvavamu: Rovējo. ⁴Rovë'ego ae sino kavuo avohë'e horse-re ruehijō. Rueromo vōrōe bojami'ego baehijō ēhuro sa'ae gō gō huë mae baerovarue muoho ijumēhego ae gōēro gōho muo'amo'irōhego. Ēhi ě'irōhego muorovarue kaejō ěgoho hesi ōrire bojamilijō.

⁵Ēhi'ego Sheep Harihehu urimo surire sivae niō'i gohadoho rōhu number 3-oho gohohijō. Gohamu evare hejodeje God rajahijaje majo gōhuro uvavamu: Rovējo. Rovējamu naro ga'i gavodeje ae rōvë'e horse-re hiromu i'ue gavarue inōmoho baejē'e rovamu sa'a hesi iruno'oho ga'irōhēro i'ue dimino'e jiego. ⁶Ae rōvë'e horse-re hiromu i'ue gavarue inōmoho baejē'e rovamu gagoro hejodeje God rajahijarue majo jabesi ririre jioromo aēro jōvanovoromo sino rōvë'e horse-re rovade a hesi ōrire uavavamu: Jero sa'a iruno'e ijumo'anujō. Ijumo'iramu iruno'oho sisērōromo bogojianovo'ajējo. Ioho bogojianovo'iramu ēhuro hesi manaho ajiomō'ajējo. Ajiomō'iramu aehu i imo'iē'iroho majae gemu hesi mu vaejare manaho bu'ō barēromo ēhuro majae gemu hesi iruno'o maho o majae niō'i gemu hesi iruno'o sisēho ujuoho'aruējo. Suvuoroho ěmino'e ajiomō'ajējo. Rōhu jaehu iruno'o ijumē'oho olive ijo bajohu'o grape ō'i bajohu'o bogave ijumo'iranējo.

⁷Ēhi'ego Sheep Harihehu urimo surire sivae niō'i gemu gohadoho rōhu number 4-ho gohohijō. Gohamu evare hejodeje God rajahijaje majo gōhuro uvavamu: Rovējo. ⁸Rovējamu hegorovo ga'i gavodeje ae sino jio'ajivë'e horse-re rovamu. Jio'ajivë'e horse-re rovade a hesi ihoho A Vuovëvo'irōhe Aho jiadeje. O ae gō hesi ijore ruehijō. Hesi ihoho Vuovë'e Aribōvi Raromarue Ōri ari'oho jiadeje. Jabu niō'i vōrōe bojēmī'ego baehijō sa'ae aho'obēhe tariojēgo ēhi niō'i ēhi niō'i jiego jaburo gemu baerōhēni. Gemu baeromo ijumēvego gōēro gōhu'o muorovoromo vuovorōhego. Ie barēromo vuovorōhego. Guomo guomo sisē baeromo vuovorōhego. Je'o miēro umijēgo vuovorōhego.

⁹Ēhi'ego Sheep Harihohuro urimo surire sivae 4 gohadoho rōhu number 5-ho gohohijō. Gohamu evare gavodeje vuovëvë'e a jabesi aru'ahoho God-ni suvuoro bahijarue maratu bēhire sa'are raromamu.

Ëraromare hesi bëhoho urimoho ë ariböviohuro God-are jöho uehorovoromo biririvoromo majëhinövareje. God-are jöho biririvoromo majëhijamu gagorovo aëro muo'amamu vuovëvadeje. Muo'amamu vuovëvë'ëro ëhu'ëro jabesi aru'ahoho ë raromohijo. ¹⁰Raromoromo ma-darugo'o uvoruomohijo: O asë'e Bada ja darugo eni jië'e ae javajëjo. Ja mu sisëho bogo vaejanue o sareri'e jöho bogo jövanue a ma-maemu javajëjo. Röhu ë sa'are raromarue ariböviohuro no bijuëmavuare höjo. Ëhuni ja majae dimino'e ma-nunëremuoho gëbe va'oromo evare ë jabesi mu sisëho mevo gëromo i'uoho mana bojëminëjo. ¹¹I'uoho mana bojëminëjamu ajivë'e niögu ëgoho ë aribövioho suvuorëmi'ego ujuohoruomohijo. Ujuohoromo hejareje uëvavamu: Majae ma-bisemu ëgo'o nuhanovorëjo hujeji jemë muo'amëvarëhi jemë'o nasi mu vaejarue ö mueno'o aehu muo'amego vuovoröhe aribövi ioro'ioroho rue barëjago evare i'uoho mana bojëmi'irode höjo.

¹²Ëhi'ego Sheep Harihehu urimo surire sivae övo gö mine gohadoho röhu number 6-ho gohohijo. Gohamu evare gavodeje sa'aho börömo böröme hijiohijiovamu. Sa'aho hijiohijiovo'ego niögu sisë rövë'e jiajëhi maja nunohuro ëhi rövo'ego manaerohuro kö va'ëne kavuohijo. ¹³Manaerohuro kavuo'ego buru börömehu rueromo meso hijiovego meso böso l'ehu rireromo ruvebijajëhi jiji mujöru'ohuro ëhi sa'are rireromo ruvebihijo. ¹⁴Rireromo ruvebi'ego aehu suri huhohago bogo gavaruëhi ö'idöhuro ëhi arorovoromo sisërë va'ohijo. Dahore aho'obëhe o sa'a dirö dirö'e jovore jio'amajoho aho'obëhe arua anumiae va'ohijo. ¹⁵Arua anumiae va'ego sa'are a masijo masijoho a duvaho ioro'ioroho muorovo a masijoho inömo marohë'e aribövioho darugo'e aribövioho a jabesi muemu vaejarue aribövioho jabesi nimoro mu vaejarue aribövioho ëhi ae aho'o huruomo va'oromo juju gagore dahorure munë burure gurihirovo barëhijo. ¹⁶Gurihirovo barëromo uvoruomohijo: Dahoroho munëho jemëro ahoromo urahahuego ëhuro röho mare börömo hijaje ae God bogo gö'irajo. O Sheep Harihu hesi vöröho no bogo baejavuo'irajo. ¹⁷Ëhesi bëhoho vörö majaho rovë'e höjo. Raro ë vöröho uraho nami'a'ajëjo.

God-hu hesi aribövie 144,000 avoho muebejëvade jöhoje.

7 ¹Ëhi'amu gavodeje anerae 4 riravamu. Sa'ae aho'o dinö'e dinö'e jiajoho ririre jio'i jabumë aruhiae anumiae aruae aviae riravo rova'ohijo. Riravo rova'oromo anerae gemuëro gemuëro burehu rovajoho gemu gemu tugohohijo buroho bogo rueromo sa'aho jovoho ijoho huosihoröhego. ²Buroho ëhi tugohamu gagorovo na gavodeje anerae göëro aruhe maja rojomajire jioromo rojomamu. Rojomoromo God darugo'ehu hijaje hesi jajivarue inömohe hesi övëro baejë'e ruehijo ëhuro God-are aribövi jabesi sinore taemëhego jaji'e jio'amo'iröhego. Rueromo ma-darugo'o uvohijo rue anerae 4-ho jaburo hejöro mami'e sa'a'o sö

jovo'o ijumo'iröhe vöröho God-aro baerumë'ëro. ³Uvoromo uvohijo: Jemëro sa'aho jovoho ijoho nadi vejö'oho ijumo'amohëjo. Hujeji God-are mu vaejarue aribövi jabesi varijore God-are soroho jajivëhego evare jemëro ë jajoho garomo uvo'irarijego: God-ro tugohë'e höromo jemëro jabumë bogo ijumëvo'i öri ari'ohemu ijumo'irarije höjo. ⁴Ëhi uvavamu hejë'i hejodeje aëro uevamu: God-are soru varijore baejare aho 144,000 ëmino'e höjo. Israel hesi agane 12 aho'obëhe baebe va'ë'e höjo. ⁵Judah'hesi ujoho 12,000. Reuben hesiroho 12,000. Gad hesiroho 12,000. ⁶Asher hesiroho 12,000. Naphtali hesiroho 12,000. Manasseh hesiroho 12,000. ⁷Simeon hesiroho 12,000. Levi hesiroho 12,000. Issachar hesiroho 12,000. ⁸Zebulun hesiroho 12,000. Joseph hesiroho 12,000. Benjamin hesiroho 12,000. Ëaribövioho 144,000 jaburo God-are soroho baerumade höjo.

God-are aribövie ae aho'obëhe riravorumade jöhoje.

⁹Ëhi'amu naro ga'i gavodeje ae aho'obëhe mae riravamu. Bogo adaho varijënoho jiohijo. Sa'ae dinö'e dinö'e agane gö gö sine gö gö huë gö gö aribövioho ajivë'e niögu ëgoho io'amë'e juva hanoho ujuohë'e God-are röho ma hesi nuninö Sheep Harihu hesi nuninö riravohijo. ¹⁰Riravoromo ma-darugo'o uvoruomohijo: God röho mare hiromo muebejavuajohu'o Sheep Harihohu'o jaburo niö'iro mabëhe ajamuiromo manö babamavuë'e höjo. ¹¹Ëhi uvoruomamu God-are röho maho riri mare jio'i God rajahijarue maje 4-ho ruë numë riravo rova'i röhu majo jabesi dejonö a duvahoho ruë numë raromo rova'i röhu a duvahoho jabesi dejonö ë aneraho aho'obëhe ruë numë riravo rova'ohijo. Ëhi riravoromo röho ma hesi riröre ague aho raromoromo God rajahiruomohijo. ¹²Rajahiromo uvoruomohijo: Aveho iae mae-ëjo. Aji maho uehoro maho iho maho darugo maho vörö maho nosi Böröme God-aremu jiajoho ëhi ma-jiemu jiobe va'a'ajëjo. Ma-jiemu jiobe va'ie'ego noro hu gemu rajahiromo huë mabëhe uanövo'ejarëjo. Iae mae-ëjo.

¹³A duvahe 24-ho röhu gemuëro ri'öromo na uehijo: Ëajivë'e niögu ëgo io'amë'e aribövioho rahumë jioruomajëjo. Dinö'e jioromo rueruomade höjo. ¹⁴Rueruomade höjamu naro uavodeje: Na bogo gavajëjo. Jasi jero gavanuëjo. Jasi jero gavanuë'ego rue a duvahohuro uehijo: Ëajivë'e niögu io'amë'e aribövioho ëho bogo vuovëvë'e sa'are raromamu evare Iesu bijönimarue ariböviohuro jabesi örire huë vavaene börömo bëhe bojëmamu baerumade höjo. Baeromo röhu iae mae rueruomade höjo. Jabumëro God-are Sheep Harihu hesi köhuro jabesi niögoho u'oruomamu jabesi sisëho barëjêhë'ëro niögoho ma-ajemu jiëho'amajëjo. ¹⁵Ëhu'ëro jië'ëro jabumë God-hu hijaje röho ma ë hesi nuninö riravoromo hesi osare vahie majae ma-hesi muohemu vaemu vaejahoruomaje höjo. Vaejaho'iramu röho mare hijaje ahuro jabu'o gemu mae hiromo mu

sisēho raboho tugohēho'iramu munē bururo raromanovoruomo'ajējo.
 16 Munē bururo raromanovoruomo'iramu ijonōho vadunoho bogo
 hōmēvonōvo'ajējo. Huēho bogo girihēvonōvo'ajējo. Majaho bövioho
 bise'oho bogo ravēvo'iramu sinoroho vōrō'iraeromo birebirēgonōvo'ajējo.
 17 Rabēni hesi bēhoho God-are Sheep Harihe rōho ma hesi ririre
 hijaje ahuro ē aribōvioho hesi Sheep ōmo'ōmego gagovēvoromo
 muebejēvonōvo'ajējo. Muebejēvoromo sō ujuohoromo a i'ovēvo'irōhe
 jovore ē va'onōvo'ajējo. Ēhi'o'iramu God-ro jabesi nuni jovoho
 miorēho'iramu jabesi huē vavaenoho aho'obēhe barē'ajējo.

**Suri badihi taemo'amare sivae 6 gohobe rovadoho
 ijo tugoho'i number 7-ho gohade jōhoje.**

8 1 Ēhi'ego Sheep Harihehu urimo surire sivae ōvo gö mine ōvo göre
 gemu gohadoho rōhu ijo tugoho'i number 7-ho gohohijo. Goho'ego
 evare ō'idōho jōrumoraebe va'ojuvo half hour rabu'e barējadeje. 2 Ēhi'amu
 evare anerae 7 God-are nuninō riravaruoho naro gēvodeje. Riravoromo
 hēgōe aho'obēhe 7 bojēmi'ego gemu gemu ujuohohijo.

3 Ujuoho'ego anerae gōero gold'e hevōho baeromo ruehijo ose ē
 bamoromo vēnēro buejego ridi'e vēni u'ohuro God-ni ajiomorōhego.
 Hevōho baeromo God-ni suvuro vēnehu buejarue maratue gold'ehu
 avohare ē hesi bēhire rueromo ē namihijo. Nami'ego aēro ose aho'obēhe
 bojami'hijo huro God-hu hijajire nuninōrire maratuore ē bamoromo
 buejego God-are aribōviohuro ēninamijego ēninamaruohu'o ridohu'o
 gemuoro havoromo God-arire ajiomorōhego. 4 Osoho bojami'ego
 anerahuro ōvēro ma'eno'ego God-are aribōviehu ēninamaruohu'o
 ridohu'o gemuoro havoromo God-arire ajiomohijo. 5 Ēhi'ego anerahuro
 ridi'e hevōho baeromo God-ni suvuro vēnehu buejarue maratu dōre
 rav'e vēnoho aegoromo irijiomō'ego vēnoho suovoromo io'amo'ego sa'are
 rireromo abuehijo. Rireromo abue'ego baderivoromo vajeri varuru'e
 vaeromo sa'aho hijiohijiovohijo.

Aneraehu hēgō huobe rovere jōhoje.

6 Ēhi'ego rue anerae aho'obēhe 7-ho hēgōe gemu gemu ujuohē'ero huo'i
 jō'ore bamohijo.

7 Jō'ore bamoromo anerae number 1-ohuro hēgōho huohijo. Hēgōho
 huo'ego ēnēro direjohijē'e masijohu'o vēni'o kō'o buarohē'oho otehō'ō'ego
 ō'idōre jioromo sa'are rireromo abuehijo. Rireromo abue'ego sa'ae aho'o
 ije aho'o niō'i gemu tariojaroho gemu ō'idōre jioromo rireromo abuejade
 vēnohuro ravo barēhijo. O garasi rude rōv'e ma-maho aho'obēhe ravo
 barēhijo.

8-9 Ēhi'ego anerae gemuehu hēgō huadoho rōhu number 2-ohuro
 hēgōho huohijo. Hēgōho huo'ego evare dahoru bōrōme vēnehu

ravanovë'ohuro ahoromo sô jovo e'ure abuehijo. Abue'ego sô jove aho'o jovo mie aho'o boat aho'o niö'i gemu tarijaroho jovëro dirö'e gemu köræhijo jovo mie ë dirö'e gemuore vuovohijo boat ë dirö'e gemuore dadorovo'amohijo. Röhu dirö'e niö'i bogo.

¹⁰Ëhi'ego anerae niö'iehu hëgö huaroho röhu number 3-ohuro hëgöho huohijo. Hëgöho huo'ego jiji böröme ö'idöre jioromo vënëro ravanovë'e be'abuehijo. Be'abuero rova'oa'më'e jove aho'obëhe sa'a gagore rojomo'amaje jove aho'obëhe niö'i gemu tarijaroho dirö'e gemu taemohijo. ¹¹Taemamu jovoho ajuovadeje jiji hesi ihoho Ajuo'ëro jii'ëro. Ajuovo'ego ae aho'obëhe ë jovoho ue'ahoromo ajuomo'amoromo vuovohijo. ¹²Ëhi'ego anerae aho'obëhe niö'i gemuehu hëgö huaroho röhu number 4-huro hëgöho huohijo. Hëgöho huo'ego majae manaere jiji mujöru'e ha'ose aho'obëhe niö'i gemu tarijaroho gemu sisërëhijo. Sisërëromo ramoramovohijo. Ramoramovë'ëro ëhu'ëro majae sisonu'e jeni'e maja'e ajivo'iröhe majae bamo'iröhoho niö'i gemu tarijaroho gemu bogo ajivo'i ramoramovohijo. O manaerehu jiji mujöru'ehu vahi'e ajivo'iröhe majae niö'i gemu tarijaroho gemu bogo ajivo'i ramoramovohijo.

¹³Ëhi'amu naro ga'irögoro ë'amu gavë'i evare hejodeje buruhohuro döre biojë'i uvavamu: O vaevë'e vaevë'ëjo. Sa'are raromaruje aribövioho anera ioro'ioroho niö'i gemu jaburo hëgöho huobe va'iramu jemë sisërëjë vo'ajëjo.

9 ¹Ëhi'ego anerae ëhi niö'i ëhi niö'iehu hëgö huaroho röhu number 5-huro huohijo. Huamu gavode jijoho ö'idöre jioromo sa'are be'abuejë'e jiamu gagorovo gavodeje gua gago ëgobövi ma ë hesi ojo jiovarue key-oho aëro jiji hesi örire bojami'ego baejamu. ²Gua hesi ojo jiovarue key-oho baenugoromo gago ëgobövi hesi ojoho jiovohijo. Jiovo'ego vëni böröme böröme gua gagore jioromo u'ivoromo rojomohijo. Rojomoromo majaho tugoho'ego öri ari'oho aho'obëhe ramoramovohijo. ³Ramoramovo'ego guaeaviguaeviëro vëni u'ire jioromo sa'are ruvebiruomohijo. Ruvebiromo ë guaeaviguaeviohuro niani'ö hesi vörö va'ënoho baejareje ae ijumo'amoröhëni. ⁴Vöröho baeromo röhu heruomadeje uëvavamu: Garasie ije ö'e iruno'e resu resue rabe rabe sa'are jiajoho bogave ijumo'irarijëjo. God-are soru varijore bogojii'ohemu ijumëvorëjo. ⁵Ijumëvë'oho jabumë nadi muo'amëvo'irögoro niani'öehu umijego vi'ehëgaje ëhi jii'e vi'ehoho manaere övo gö mine bojëmibe va'orëjo. Ëhi uëhijo. ⁶Ëhi uëvadëhi ë manaere övo gö mine hesi uhure ë ijumëvë'e aribövioho vuovo'i nëgo'ë'e. Vuovo'i nëgo'iramu vuovo'i öroho bogo biroho'ë'ö.

⁷Röhu ë guaeaviguaevi jabesi sino haho'oho muorovo'irögoro avohëhare horse-oho va'ëne jio'amohijo. O jabesi simanore gold'e bosö va'ënoho didi'ëho'amë'e jiohijo. O jabesi nu ano'oho a nosi nu ano'o va'ëne

jio'amohijo. ⁸O jabesi simano uoho magonahe simano rudu'e jabesi u jiajēhi ēhi jiohijo. O jabesi anoho vösö'e lion jabesi ano va'ēne jiohijo. ⁹Röhu aehu muorovo'irögoro biriri'e niögehu vinebi tugohoromo io'amarue ēhi jiē'e biriri'e niögoho vinebire io'amē'e jiohijo. O vivojehu dihodiohovoromo huosihē'o'oho ēho muorovo'ia va'i horse-ehu maratu jagu ujuohoromo darugo'o va'ego garahörö'e baejego hejaruēhi ēhi jiaovahijo. ¹⁰Röhu jabumē uho'e jio'amohijo. Jabesi uhoho vörö'e niani'ö uho va'ēne jio'amohijo. Vöröho uhore jiē'ero ē uhohuro manaere övo gö mine umibe va'ē'ö. ¹¹Röhu ē guaeviguaeavi jabesi börömo vaeromo muebejēvaje aho gua gago ēgobövi muebejaje anera sisēhoje. Eanera hesi ihoho Hebrew jöero uvarueje: Abaddon-ajo. O Greece jöero uvarueje: Apollyon-ajo. Eiho hesi bēhoho bövi bise'o ijumo'amajohoje.

¹²Guaeviguaeavi rueruomade vavaeni'e muoho iae barē'i röhu buruhehu uvade vavaeni'e muoho niö'i gö'o rue'ē'e.

¹³Iae anerae övo gö minehu hēgö huaroho röhu number 6-huro hēgöho huohijo. Hēgöho huamu hejodeje God-are nuninö namijaje gold'e maratu osore osore jioromo uvavamu. ¹⁴Uvoromo ē vejö'e hēgö huaje aneraho uavavohijo: Nume anerae ēhi niö'i ēhi niö'i Euphrates jovo börömore tövëvaroho jiovo nugö'ö'amējo. ¹⁵Jiovo nugö'ö'amējamu rue hēgö huade anerahuo ē anerae ēhi niö'i ēhi niö'i tövëvaroho jiovo nugö'ö'amohijo ae aho'obēhe sa'are raromaruoho niö'i gemu tarioromo niö'i nugo'i gemu muo'amo'iröhego ē aneraho ēhi niö'i ēhi niö'i God-ro tövëvoromo bamëvë'ero ē majaho ē manaeroho ē vadunoho rovego jiovo nugö'ö'amego ē sa'are aribövioho muo'amëvoröhego. ¹⁶Röhu ē anerae 4 jabesi horse-re va'arue muorovo aribövioho iae 200 million jiadeje. Ejöho iae na hejodeje. ¹⁷Röhu ē muorovo'iröhe horse jabesi o horse va'arue muorovo aribövi jabesi nu ano'o'oho nia'ovoro gavodeje. Jabesi vineboho biriri'e niögohuro tugohoromo io'amē'e jiohijo. Röhu biriri'e niögu jabesi nu ano'o'oho kavu'e vëni hödu va'ēne röv'e vëni u'i va'ēne o höv'e munë ravoromo hödu höv'e jiajēhi ēhi jio'amohijo. Röhu horse jabesi simanoho lion jabesi simano va'ēne jio'amohijo. Röhu vëni höde vëni u'e o höv'e munë ravoromo hödu höv'e jiajēhi jiē'oho ēho jabesi jö'ore jioromo suorovohijo. ¹⁸Horse jabesi jö'ore jioromo suorovoromo vëni hödoho o u'oho o höv'e munë höv'e jiajēhi jiē'oho ē mu sisëhuro ae aho'obēhe sa'are raromaruoho niö'i gemu tarijaroho niö'i rëmo'i gemu ravëvo barëjadeje. ¹⁹Röhu ē horse jabesi vöröho jabesi jö'ore o jabesi uhore jiohijo. Jabesi uhoho simano'e jiohijo ehuro ae ijumo'amo'iröhëni. Jabesi uhoho simano'e jiē'ero ehul'ero ē uho jabesi nu ano'o'oho sigobu sisë jabesi nu ano'o va'ēne jiohijo.

²⁰Èmu sisëhuro ēhi rueromo ijumëvo'ego a ioro'ioroho vuovëvo'i ioro'ioroho bogo vuovëvohijo. Bogo vuovëvadeje röhu inömo sisë jabesi övehu avohoromo uehorovaruoho bogo uehorovoromo vuonugo'i a'i

inömo sisë gold-ehu o silver-ehu o copper-ehu o munë göehu göehu o ijehu avoho'amaroho sarerivoromo uvoruomohijo: Èho aru'aho'e hōromo uehorovemu uehorovoruumohijo. Rōhu ēhi jië'e inōmoho bogo uheriharueje. Bogo hejarueje. Bogo jijiharueje. Ma-momorö'ōjarueje. Èhi jië'e inōmohu'o aru'aho sisëhu'o uehorovaruoho bogo vuonugo'i ēhi mauehorovoruumohijo. ²¹Èhi ma-uehorovoromo a muo'amarue muoho bogo vuonugoromo iro oso'e muoho bogo vuonugoromo önö'e muoho bogo vuonugoromo vajiohu'e muoho bogo vuonugo'i ma-vaemu vaeruomohijo.

Aneraehu suri bise'o John bojamamu ijade jōhoje.

10 ¹Èhi'amu gavodeje anera göho hesi darugoho bövi maho jië'ero suëro numë'e simano dōre nuoge ba'amë'e sa'are ruvebijamu. O hesi nu ano'oho maja va'ëne ajivë'e jio'i hesi hōroho vëni hōdu ëgobövi va'ëne jiohijo. ²Rōhu huhoharue suri bise'oho jiovë'e ë anerahuro övëro ma'enhijo. O hesi hōru maho sō jovo dōre bamo'i hesi hōru adoho sa'a dōre bamoromo ēhi namihijo. ³Èhi namiromo lion-ehu uvaruēhi ēhi ma-vöröremu uvohijo. Uvo'ego vajeroho aho'obëhe övo gö mine övo göre niö'i ano'amoromo dirö'e göre göre ēhi uvobe va'ohijo. ⁴Vajeroho anoromo uvobe va'amu hejë'i ë vajerehu uvare jōho naro jajivo'irōgoro ë'odeje. Jajivo'i ë'irōgoro hejodeje jöe ö'idöre uevavamu: Vajere övo gö mine övo göre niö'i uvaroho nadi jajivo'i subivëhonëjo.

⁵Rōhu hōru gö sō jovore bamo'i hōru gö sa'are bamë'e namijamu gavode anerahuro övo maho ö'idöre nugojiomohijo. ⁶Nugojiomoromo God-are ihore darugo'e jōho majëhiromu uvohijo: Ioro'ioremu hijaje aho God ö'idö sa'a jovo bövi bise'o avoho'amade ahuro ge'ego na ave jōho majëhi'irōgoro ë'ajëjo. Ijonōho bogo muebe'irōgoro 7a'i anera göhuro hëgōho huo'iramu evare God-hu mami'e subivahuade mu jioröhe jö God-hu hesi mu vaeromo jö majëhijarue aribövi uëvadoho ë muoho iae jio barë'ajëjo.

⁸Èhi uvamu rōhu urimo ö'idöre uevavamu hejode ahuro jöe gö majëhiromu uevavohijo: Rue anera hōru gö jovore bamo'i hōru gö sa'are bamo namiromo jiovë'e suri övehu ma'enajoho ë suroho jero va'oromo baejëjo. ⁹Èhi uvamu hegorovo naro va'oromo aneraho uavodeje: Suri bise'oho bojemijëjo. Suri bise'oho bojemijëjamu uevadeje: Më suroho baeromo ijëjo. Baeromo i'iramu jö'ore vuomëro rihuamanovo'i rōhu dë vi'ehago'ajëjo. ¹⁰Vi'ehago'ajëjamu naro baeromo ijamu vuomëro rihuemanovoromo hejodeje dë vi'ehagavamu.

¹¹Vi'ehagamu aëro uevareje: Rōhu maho ri'ōromo sa'ae dinö'e dinö'e sine gö gö huë gö gö sa'are a masije gö gö ëho jabesi jö God-hu jövajoho jero majëhinego ae aho'obëhe he'irarëjo. Jasi muoho ēhi hōjo.

God-are jö majëhijare ae niö'i jabesi jōhoje.

11 ¹Èhi ue'ego aëro guduodo va'ëne vahu baejarue ijahe memiromo uevavohijo: Ri'ö va'oromo God-are javu bōrōmo hesi vahuoho

o God-ni mi suvuoro buejarue maratu hesi vahuoho baeromo ganëjo dimino'e jiego. O osare raromoromo God rajahijarue aribövioho adahoromo ganëjo dimino'e jiego. ²Röhu God-are javu hesi vahu baejë'oho rirönöho nadi baenëjo. Ëhesi bëhoho javu riröho Jew rajoho bogo a'i sa'a gö raje God-are jö bogo heruomaje aribövi jabesi örire bojëmijë'e höjo. Jabesi örire bojëmijë'ëro jabumëro rueruomoromo God-are amo börömoho Jerusalem manaere 42 hesi uhure hörü duruajo'ëro vaeruomo'ajëjo. ³Höru duruajo'ëro vae'i ë'iramu evare nasi jö majëhijarue ae niö'i naro uë'iramu jabumëro niögu sisëho io'amoromo nasi jöho majëhibe va'iröhoho ë manaere 42-ho barë'ajëjo. Ëhi uevavohijo.

⁴Ëae niö'ioho ëho sa'a muebejaje a God-are nunire rirarovarue olive ije niö'ioho va'ëne o hesi nunire rirarovarue iro niö'ioho va'ëne jëve. Ëhesi bëhoho ë olive ijo niö'i jabesi jovo baeromo buejego ajivajëhi o ë ire niö'i buejëvego ajivajëhi ë ae niö'iohuro ëhi God-are darugoho baeromo ajoho barue'ë'ö. ⁵Röhu aehu ë ae niö'i jabesi örire ijumëvo'ie'iroho vënëro ë ae niö'i jabesi jö'ore jioromo rueromo nu huodëgarue aribövioho ravëvo barë'ë'e. Ae rahu jabumë ijumëvo'ie'oho iae ëhi vuovëvo'ë'e. ⁶Röhu ë ae niö'ioho jaburo vöröho bae'ë'ö ëhuro God-are jö majëhijarue majaho rovego evare ënoho tugohego bogo ruejuvo jöho majëhi barëjego evare rueröhego. O vöröho bae'ë'ö ëhuro jabesi divare nëgë'iroho jove gö gö ijumo'amego kö'irae'amoröhego o uvego sa'are aribövioho guomo guomo sisë gö gö bae'amoröhego.

⁷Amo jabesi jöho majëhibe va'ojuvo barë'iramu vörö'e majo sisëhuro gua ëgobövire jioromo rojomoromo ae niö'iohu'o muorovo'ë'e. Jabu'o muorovoromo ruahö'öjëvoromo anëgo'iramu vuovëvo'ë'e. ⁸Vuovëvo'iramu jabesi sinoho amo börömo hesi öri börömore ëhi raromëvo'ë'e. Ëamoho sisëgo ëhuni uvarueje: Ëamoho Sodom o Egypt höjo. Röhu urimë'i ë ae niö'i jabesi A Börömoho aëro guduumoromo ë ame gemuore korosire anareje. Amo ë ame gemuore jabesi sinoho raromëvo'ë'e. ⁹Raromëvo'iramu sine gö gö agane gö gö huë gö gö sa'ae dinö'e dinö'e aribövioho ëho jaburo rueromo ë ae niö'i jabesi sinoho ërimëhoromo uarovonövo'ë'ö: Bogo guavëvo'ëjarëjo. ¹⁰Ëhi uarovoromo sa'are raromarue ariböviohuro uvoruomo'ë'e: Ëae niö'iohuro huë vavaene aho'obëhe nosi örire bojamuinöväre höjo. Röhu vejö'oho vuovëvë'e höromo nimoronimorohoromo suvuoramirovo'ë'ö. Ëhi'ojuvo majae niö'i gemu röhu ma-bisemu hesi ijore barë'ë'e. ¹¹Ëmajaho barë'iramu God-ro jö'o ögëro jabesi nu gagore huosihëho'iramu vuovëvadoho i'ovoromo ri'öromomo döro rirarovo'ë'ö. Döro rirarovo'iramu ae aho'obëhe jabumë gëromomo juhuonivo avoho'ë'ö. ¹²Juhuonivo'iramu ë ae niö'iohuro he'ë'ö ö'lidöre jöe uvo'iramu: Avehuro rojomohëjo. Avehuro rojomohë'iramu evare jabumë nu huodëgarue ariböviohuro ga'ë'ö ë ae niö'ioho

ö'idöre suëro numëvobe ajiomo'iramu. ¹³Ö'idöre ajiomo'iramu evare sa'aho hijiohijiovo'ë'e. Sa'aho hijiohijiovo'iramu amo taritarivaroho dirö'e 10 jië'ëro dirö'e 9 mae jio'i dirö'e gemu ijumo barë'ë'e. Dirö'e gemu barë'iramu ae aho'obëhe 7,000 vuovëvo'ë'e. Vuovëvo'iramu a ioro'iorohuro juhuonivoromo uvo'ë'ö: Asë'e ö'idöre hijaje ae God hesi ihoho böröme höjo. Èhi jioröhoho naro nia'ovoro gavodeje.

¹⁴Vavaeni'e mue niö'i buruhehu uvadoho iae barë'i röhu number 3-oho ma-burëro rue'ë'e.

**Anerae hu hëgöe 6 huobe rovaroho ijo tugoho'i
number 7-ehu huade jöhoje.**

¹⁵Iae anerae övo gö mine övo göre gemuehu hëgö huaroho röhu ijo tugoho'i anerae number 7-huro hëgöho huohijo. Hëgöho hu'ego ö'idöre darugo'o uvoromo uvoruomavohijo: Jaruvoho nosi Bada God'o God-hu uavë'ëro böröme namiromo ajamuijaje aho Keriso'o jabu niö'iro darugoho baejë'e höjo bövie rirarovoromo sa'ae aho'obëhe muebe'amoröhëni. Darugoho baejë'ëro God-ro böröme namiromo muebemu muebebe va'onövo'ajëjo. ¹⁶Èhi uvavamu hegorovo a duvahe aho'obëhe 24 a masijehu raromarue röho mare God-are bëhire raromaruohuro ri'öromo ague aho raromoromo God rajahiruomohijo. ¹⁷Rajahiromo uvoruomavohijo:

O asë'e Bada God daruge aho'o baejë'e ae javajëjo.

Urimë'i jiobe rovanoho jaruvohu'o èhi gemuoho hiemu hijanue ae javajëjo.

Jasi darugo börömoho baeromo dö mare hiromo aevoromo aho'obëhe muebejavuë'ego èhuni rajahijaruëjo.

¹⁸Urimoho sa'ae dinö'e dinö'e raromarue ariböviohuro vörö'iraejë'e raromonövere höjo.

Jaruvoho jero jabesi örire vörö'iraejanuëjo.

Majaho rovë'e höjo vuovëvë'e aribövi mevëvoromo gë'iranoho mae o sisë jëvego.

Gëromo jasi mu vaejahoromo jö baeromo majëhijarue aribövi jabesi mana bojëmi'iranoho

jasi aribövi ma jabesi mana bojëmi'iranoho

jasi iho mae uehorovarue aribövioho ininore va'o masijore jabesi mana bojëmi'irane ë hesi majahu'o

sa'are bövi bise'o ijumaruoho mana ijumëvo'irane ë hesi majahu'o rovë'e höjo.

¹⁹Èhi uvo'ego God-are osae ö'idöre jiajoho jiovohijo. Jiovo'ego God-are jögoru jiaje maua va'orahoro jiohijo. Va'orahoro jio'ego baderivoromo vajeri varuru'e vaeromo sa'aho hijiohijiovoromo ënëro direjohijë'e masije darugo'o ruvebihijo.

Sigobu börömehu magonaho sihade jöhoje.

12 ¹Ëhi'amu gavodeje bogo gavaruëhi jië'e mu böröme gö ö'idöre jiamu. Ëmu hesi bëhoho magonahe gemu jiohijo. Majae niögu va'ëne ba'amë'e jiohijo. O höroho manaerore bamë'e jiohijo. O hesi simanore jije aho'obëhe 12 inovoromo bosö va'ëne didi'ahë'e jiohijo. ²Röhu hu dë'ëro jië'ëro raho'irögoro vi'ehe böröme baeromo hara'uoromo darugo'o jö'e dadovavohijo.

³Ëhi'ego bogo gavarue mu böröme gö'o ö'idöre ruehijo. Ëmu hesi bëhoho kavuë'e sigobu börömo böröme jiohijo. Vörö'e mae jiohijo. Hesi simanoho aho'o övo gö mine övo göre niö'i jio'amohijo. O hesi danoho aho'obëhe övo gö mine övo gö mine jio'amohijo. O sigobu simanoho gemu gemu a masijehu io'amaruëhi jië'e bosöhuro didi'o'amë'e jio'amohijo. ⁴Röhu jije aho'obëhe ö'idöre jio'amajoho niö'i gemu tariojaroho dirö'e gönö niö'i nugo'i dirö'e gönö gemu sigobu hesi uhohuro sa'are ujuoho io'amohijo. Ujuoho io'amoromo ë harihu raho'ie'aje magonaho hesi nuninö raromoromo muebehijo rahego harihoho i'iro. ⁵Raromoromo muebe'ego rue magonahohuro harihoho rahohijo huro ijönö hujejo ha'itoho baeromo sa'ae dinö'e dinö'e raromarue aribövioho vörö'o muebejëvego jaburo hu gemu ejahoröhego. Amo harihoho raho'ego ë aho ma-majioho ba'ojio God-hu röho mare hijajire ë nugohijo. ⁶Evare vëmohuro ju'ebiro mo arue a rumo'e sa'are va'ohijo God-hu avohahade öri ari'ere ë hijego God-ro ajamiromo muebebe va'ego majae aho'o 1260 barë'iröhego.

⁷Ëhi'ego ö'idöre muorovohijo. Anera böröme Michael'o huhu muebejëvaje anerahu'o ëho jaburo ri'öromo sigobohu'o muorovoruumohijo. Muorovo'ego sigobohu'o sigobu hesi anera ömo'ömohu'o mana muorovëmihijo. ⁸Muorovëmi'ego rueho jaburo sigobohu'o hesi ariböviohu'o taemëvohijo. Taemëvoromo uëhijo: Ave ö'idöho ioro'ioremu vuonugo'i va'ohëjo. ⁹Ëhi uëngoromo ë sigobu böröme ö'idöre jiajoho baba'amohijo. Ësigoboho ni'i'ivadire jiohe rovadoho hesi ihoho Devil o Satan jiohijo. Sa'ae dinö'e dinö'e raromarue aribövi sareramuije juvaje ahoje. Hu'o hesi anera sisë ömo'ömohu'o sa'are baba'amëvohijo.

¹⁰Baba'amëvamu hejodeje ö'idöre darugo'o uvavamu: Jaruvoho nosi Börömoho God-ro hesi darugoho röjahuiromo bövi mae namiromo sisëho noni ruahö'öjahuë'e höjo. O jaruvoho God-hu uavë'ëro böröme namiromo ajamuaje aho Kerisoro no muebejavuaje darugoho röjahuijé'e höjo. Ëhesi bëhoho jö sisë majahijaje aho baba'amë'e höjo. Huro God nosi A Börömo hesi nunire namiromo vae majae nosi ö mueno'o jabesi jö sisëho sareramiro mo majahinövade höjo. Röhu jaruvoho baba'amë'e höjo. ¹¹Nosi Christian ö mueno'ohuro uvare höjo: God-are Sheep

Harihoho kōe rueromo guomè'ëro mae javuajë uvoromo hesi jōho ae sama'e majëhiromo ëhuro sisëho ruahö'öruomade hōjo. Jabesi sinoho bogo uehorovo'i uvare hōjo: No Keriso-are jōëni vuovë'o ho iae hesi hōjo. ¹²Ëhuni ö'idōho mabëhe hōjo. Ö'idöre jiaruje aribövioho mabëhe jëvaje nimorohohëjo. A'i sa'ahu'o jovohu'o vaevë'e hōjo ë hesi bëhoho Satan hu ë abuejë'ego. Abuejë'ëro garomo uvaje hōjo: Nasi majaha barë'irōgoro ë'ajëromo vörö'irajë'e hōjo. Ëhi uvoruomohijo.

¹³Ëhi'ego rue sigobohuro gavade baba'amë'ëro sa'are jiamu gagorovo aharihu rahade magonahoho ijumo'i siho baeromo va'ohijo. ¹⁴Siho baeromo va'ego buruhi bōrōmo hesi vivojoho niö'i magonahohuro God-aro baehijo ëhuro bioromo a rumo'e sa'are va'oromo hesi rōhore hiröhëni. Hijego God-ro muebejego sigoboho ë magonahehu hijaje öri ari'eroho bogo va'ego vadune aho'obëhe niö'i gemu rōhu ma-bisemu hesi ijore barërōhego. ¹⁵Ëhi'ego sigobohuro jovo bōrōme hesi jō'ore otehö'öhijo ë jovohuro ruomoromo ë magonahehu jiajire va'oromo ë magonahoho bava'ojōro. ¹⁶Jovoho otehö'ö'ego jovohuro magonahoho bae'i rue'ego sa'ahuro magonahoho ajamiromo tögōromo'ego jovohuro ë gagore va'o barëhijo. ¹⁷Va'o barë'ego ë sigobohuro magonaho hesi örire vörö'iraeromo va'oromo magonaho hesi aboji harihu'o ioro'iorohu'o muorovo'i va'ohijo. Rōhu ë aboji harihu'o jabesi bëhoho God-are jōgoru ejahoromo Iesuarë jō biririvoromo mae uehorovarue aribövioho jioruome. Ëariböviohu'o sigobohuro muorovo'i va'ohijo. ¹⁸Ëhi'oromo ë sigobohuro va'oromo sō jovo riröre raromohijo.

Vörö'e mi niö'iehu rueromo mu sisë vaejare jōhoje.

13 ¹Sigobohuro sō jovo riröre raromamu naro gavodeje vörö'e mi sisë sō jovore jioromo rojomamu. Hesi simanoho aho'obëhe övo gö mine övo göre niö'i jiohijo. O hesi danoho aho'obëhe övo gö mine övo gö mine jiohijo. O a masijehu didi'aruëhi jië'e bosōho dane gemu gemu jio'amobe va'ohijo. O simane gemu gemu God agarue iho sisëho gemuohemu jajivo'amë'e jiohijo. ²Rōhu ë vörö'e mi sisë hesi nu ano'oho leopard nu ano'o va'ëne jiohijo. O hesi hōroho bear hōru va'ëne jiohijo. Hesi jō'oho lion jō'o va'ëne jiohijo. Rōhu rue sigobohuro darugo bōrōmëro jië'ëro ë darugoho vörö'e mi sisëho bojamiromo uahijo: Na'o rōromo rōho maro ajio hiromo nasi öri ari'oho aho'o muebejehonëjo. ³Rōhu ë mi sisëho hesi simanoho gemu aëro anamu guomoromo i'ovë'ëro batato'e jiohijo. Guomoromo i'ovë'ëro batato'e jiamu ae aho'obëhe ëho garomo tiötiövoromo simane sisë'i uehorovoromo uvareje: Ëho mae hōromo hesi ijore ijore jijihoruomohijo. ⁴Hesi ijore ijore jijihoromo uvoruomohijo: Sigobohuro vörö'e mioho hesi darugoho mabëhe bojamijade hōromo ëhuni sigoboho rajahiruomohijo. Sigoboho rajahiromo vörö'e miohu'o rajahiruomohijo. Rajahiromo uvoruomohijo: Ëvörö'e mioho darugo

ma'e hōjo. Rahuaro ēhi jiē'e darugoho hōjo. Rahuro ē vōrō miohu'o muorovo'ajējo. Ēhi uvoruomohijo.

⁵Ēhi'ego God-ro ē vōrō'e mi hesi ōroho bogo tugohahohijo huro nimoronimorohē'i jō sisē jōvoromo hesi nimoromo bōvie bise'e muebebe va'ojuvo manaere aho'obēhe 42 barē'irōhego. ⁶Ōroho bogo tugohahē'ēro vōrō'e mi sisēhuro ri'ōromo God agoromo hesi ihoho ijumoromo God-hu hijaje ōri ari'oho sivoromo God'o gemu mae ō'idōre raromarue aribōvi jabesi sisēho sarerivoromo ēma jōvohijo. ⁷Jō sisēho ēhi jōvo'ego God-ro ē vōrō'e mi hesi ōroho bogo tugohahohijo huro God-are aribōviohu'o muorovoromo ruahō'ōjēvo'irōhego. Ruahō'ōjēvoromo vōrōho baeromo agane gō gō sa'ae dinō'e dinō'e huē gō gō sine gō gō aho'obēhe muebejēvo'irōhego. ⁸Ae aho'o sa'ae dinō'e dinō'e raromaruho jaburo ē vōrō'e mi sisēho iae uvene aho rōjahiruomo'ē'e. Uvene aho rōjahi'irōhe hesi bēhoho urimo God-hu ō'idō sa'a bogo bamadevare evare God-ro a ioro'ioro jabesi ihoho hesi Sheep Harihu anego guomorōhe hesi surire jajivo'amadeje hu'o maro raromemu raromo'irōhego. A ioro'ioro jabesi ihoho suriroho bogo jajivo'amadeje bogo ēhioho maroho raromo'irōhego. Rōhu iho bogo jajivo'amē'e sa'are raromarue aribōviohuro vōrō'e mi sisēho rajahiruomo'ē'e.

⁹God-are jō hejaruje aribōvioho ave jōho hehējo. ¹⁰Aehu jemē guduamēvoromo savoji gagore ba'amēvo'iē'ohoho iae savoji gagoro ba'amēvo'ē'ō. O aehu muo'amēvamu vuovēvo'iē'ohoho iae vuovēvo'ē'e. Ēhi jiē'e mu sisē rue'irōhohuni ēhuni God-are aribōvioho jemēro biririvoromo God gemu uehorovobe va'ore.

¹¹Ēhi'amu gavodeje vōrō'e mi sisē gō'o sa'a gagore jioromo rojomamu. Ēmi hesi danoho niō'i sheep harihu hesi dano jiajēhi ēhi jōvohijo. A'i huhu jō jōvajoho ē sigobu bōrōmehu jōvajēhi ēhi ma-darugo'o jōvohijo. ¹²Ijore rovade vōrō'e mi sisēhuro urimore rovade mi sisē hesi vōrōe gemuoho bae barēromo huni rōromo muoho vaehijo. Urimore rovade mi hesi muoho vaeromo sa'are raromarue aribōvioho uēhijo jabumēro urimore rovade mi sisēho uvene aho rōjahi'irōhego. Aehu hesi simanoho gemu anahamu guomoromo i'ovade ē hesi batato'e simano jiē'e mioho rajahi'irōhego muoho vaehijo. ¹³Ijore rovade miohuro urimore rovade mi hesi muoho vaeromo no bogo gavarue vōrō'e mu masijoho vaehijo. Mu masije gō gō vaeromo rōhu ae aho'obēhe jabesi nunire namiromo uvo'ego vēnohuro ō'idōre jioromo sa'are ruvebihijo. Ēhu'o ē'ohijo. ¹⁴God-ro hesi ōroho bogo tugohahē'ēro ēhu'ēro ijore rovade miohuro urimore rovade miohuni rōromo ēhi jiē'e vōrō'e muoho vaeromo ēhuro sa'are raromarue aribōvioho sarerēmihijo. Sarerēmiromo uēhijo jabumēro urimore rovade mioho rajahi'i munē o rabe sehoromo inōme hesi nu ano'o va'ēne avohorōhego. Hesi simanoho gemu anahamu guomoromo i'ovade ē hesi batato'e jiē'e mi hesi nu ano'o va'ēne avohorōhego. ¹⁵Urimore rovade mi hesi nu ano'o

va'ëne inömoho avoho'ego God-ro öroho bogo tugohahë'ëro ëhu'ëro ijore rovade miohuro ë mi nu ano'o va'ëne inömo hesi nu gagore jö'o ögëro huosihohijo mi nu ano'o va'ënohuro daruge baeromo jöe jövoromo garöhe ae rahu hesi öriroho bogo uvene aho röjahijego muo'amo'iröhego. ¹⁶Ëhi'oromo ë ijore rovade miohuro a masijoho a ininoho inömo marohë'e aribövioho inömo rumo'e aribövioho a jabesi muemu vaejarue aribövioho jabesi nimoro mu vaejarue aribövioho ae aho'obëhe mae jöe bojëmiromu uëhijo: Ë'ego no jemesi övo manö o varijore jajivëharëjo. Jajivëharëjamu ejëho'ego jajivëhohijo. ¹⁷Bogo ejëho'ibejo mi sisëhuro öroho tugohëhego iruno'oho bövioho bise'oho bogo imo'ibejo. Ëjajivëharoho mi hesi iheje.

¹⁸Ëhesi bëhoho avoho uehorovore. Ae rahu simano ma'e jëvë'oho ë mi hesi iho hesi bëhoho nahoromo birohore. Hesi ihoho 666-je. Ëihoho avoho adahë'oho a ihe biroho'anue.

God-are aribövie 144,000 jabuhu jö i'o ioruomade jöhoje.

14 ¹Röhu naro ga'i gavodeje God-are Sheep Harihoho Zion dahorure nami'ego ae aho'obëhe 144,000 Sheep Harihu hesi ihohu'o hesi Vavu hesi ihohu'o varijore jajivo'amë'e hu'o riravamu. ²Röhu hejodeje ruhe ö'idöre uvavamu. Jovehu ruomoromo uvego hejaruëhi o vajerehu anego hejaruëhi o aehu gita bejogo heromo vuëvauajëhi jöho ëhi jiavavamu. ³Ëhi uvoromo God-hu hijaje röho ma hesi nuninö hu rajahijarue maje 4 jabesi nuninö a duvaho jabesi nuninö riravoromo jabesinö nu ano'oho nugaromo jö i'oho ioruomohijo. Ae aho'obëhe sa'are sisë'i raromaruoho röhu ae 144,000 ëmino'e God-hu baejëvadoho ë ariböviohuremu ë jö i'o io'iröhoho eni jëvadeje. A ioro'ioroho bogo. ⁴Ëaribövioho magonaho'oho mu sisëho bogo vae'i ma-mae raromarueje. God-are Sheep Harihehu dinö'e dinö'e va'ë'iroho jabu'o hesi ijore ijore jijiharueje. A ioro'iore aho'obëhe jio'amajoho röhu God-ro i'u'e muoho baeromo ëhuro ë ariböviohuremu hesi baejëvadeje. Ëaribövioho God'o hesi Sheep Harihohu'o jabuhu aevo'i ma-mabëhe baejëvaroho jëve. ⁵Jabumë bogo sareri jöho atamu aho he'irögoro jabumë ma-maemu jëve.

Anerae niö'i gemu jabuhu uvare jöhoje.

⁶Ëhi'amu gavodeje anerae gö döre bioromo va'amu. Ëanerahuro God-are jö maho baej'ëro sa'are raromarue aribövioho majëhiromo uë'irögoro ë'ohijo: Ioro'iohemu jioröhe muoho ëhi ëhi höjo. Ëjö maho sa'are raromarue aribövie aho'obëhe sine gö gö agane gö gö huë gö gö sa'ae dinö'e dinö'e raromaruoho majëhi'i va'ohijo. ⁷Va'oromo jöho ma-darugo'o majëhiromo uëhijo: Jöe hehëjo. God-are öroro avo'avoho uehorovoromo uvohëjo: Hu gemu börömoho höjo. Huhu ae aho'o mevëvo'iröhe majaho rovë'e höjo. Ëhuni ö'idö sa'a sö jovo sa'a gagore suorovaje jovo bamade aho God hesi öroro uvene aho röjahihëjo.

⁸Ēhi uvo'ego anerae number 2-ohuro ijore rueromo uëvavohijo: Jöe hehëjo. Iae amoho bejë'e höjo. Iho'e amo böröme Babylon vejö'oho barëjë'e höjo. Ēhesi bëhoho urimë'i Babylon amo rajohuro mu sisë røjëhinövareje. Magonahehu ae mu sisë røjëhiromu vörö'e jovo i'imëmege ue'ahoromo simano sisërëromo önö'e jijiharüehi ëhi Babylon amo rajohuro sa'ae dinö'e dinö'e raromarue aribövioho mu sisëho røjëhijamu simane sisërëromo mu sisë sisë vaeruomë'e höjo. Ēhu'ëro Babylon rajohuro God-are i'uoho baeruomë'e höjo.

⁹Ēhi uvo'ego anerae niö'i rueromo jö majëhijaroho röhu number 3-ohuro jabesi ijore rueromo uëhijo: Jöe hehëjo. Ae rahu mi sisë o hesi nu ano'o va'ëne avoharoho uvene aho røjëhiromu hesi iho varijore o övore baejë'oho ¹⁰ë ariböviohuro God-are i'uoho baeruom'ajëjo. Aehu vörö'e jovo bogo sanuovë'e ma-ue'ahoromo hara'uarue ëhi jië'e i'uoho God-ro vörö'iraeromo bojëmi'iramu baeruom'ajëjo. Baeromo God-are anera jabesi nunire God-are Sheep Harihu hesi nunire raromoromo vënohu'o vënehu ravoromo girosijiomë'e munëhu'o ravëvo'iramu hara'uoruum'ajëjo. ¹¹Hara'uo'iramu ë aribövi ravëvaje vënoho bogo duoroho'i ma-u'ivemu u'ivonövo'ajëjo. U'ivo'iramu ae rahu mi sisë o mi hesi nu ano'o va'ëne avoharoho uvene aho røjëhijë'oho o mi hesi iho sinore baejë'oho ëhi jië'e aribövioho jabesi v'lehoho bogo u'uho'i vae majae ma-jiemu jioje va'a'ajëjo. Anerahuro ëhi uvavohijo.

¹²Ēhi jië'e huë vavaeni rue'iröhohuni ëhuni God-are ariböviehu hesi jögoru ejahoromo Iesu gemu uehorovarujoho jemëro biririvoromo ëhi gemu vaebe va'orëjo.

¹³Ēhi'amu hejodeje ö'idöre uevavamu: Jajivoromo uvonëjo: Badare muohuni avevejö'e o ijönö vuovëvë'oho jabumë huë mae baebe va'a'aruëjo. God-are Aru'ahohuro jöe gemuho jövoromo uvajëjo: Io'ajo. Iae huë mae baeromo mu masijehu u'uvëvadoho vuonugo'i nuho'aruëjo. Nuhë'i ga'a'aruëjo jabuhu vaejarëhi ëhi mae jio'iramu.

Anerae göehu aribövi ma gagovoromo avoho bahi'i anerae göehu sisë aribövi gagovoromo i'u bojëmade uhu jöhoje.

¹⁴Röhu naro ga'i gavodeje a ma va'ëne aho ajivë'e sue döre hijamu. A masijehu didi'aruëhi jië'e gold'e bosöho simanore didi'ë'e jiohijo. O anio ma'e siravaho övore jiohijo. ¹⁵Röhu anera göhuro God-are osa börömore jioromo höröromo ruehijo. Rueromo suere hijaje a hesi örire ma-darugo'o uahijo: Iruno'o gemuore bahijarue majaho rovë'e höjo. Jasi siravahuro tarivoromo avoho bahijëjo. Sa'are jiaje iruno'oho mami'e mavoromo eni jië'e höjo. ¹⁶Ēhi uvavamu hegorovo sue döre hijaje ahuro ë siravahuro sa'are jiaje iruno'o maho tarivoromo avoho bahihijo.

¹⁷Ēhi'ego röhu anera göhuro God-are osa böröme ö'idöre ë jioromo anio ma'e siravaho baejë'e höröromo ruehijo.

¹⁸Ĕhi'ego anerae gö vëni muebejaje anerahuro God-ni suvuoro vënehu buejaharue maratu bëhire jioromo ruehijo. Rueromo anio ma'e sirava ma'enaje anera hesi örire ma-darugo'o uahijo: Sa'are jiaje grape ö'i bajoho mavë'e jiaje jasi siravahuro tarivoromo ujuohëjo. ¹⁹Ĕhi uvo'ego rue anerahuro hesi siravahuro sa'are jiaje ö'i bajoho tarivoromo munë guorötore ujuoho bahihijo sa'ijosajovoröhëni. Sa'ijosajivo'iröhe hesi bëhoho God-hu vörö'iraeromo a i'u bojëmi'iröhohoje. ²⁰Munë guorötore ujuoho bahijaroho bogo amo börömoroho jio'i hesi rori'o jiohijo. Röhu ë ö'i bajoho sa'ijosajiovohijo. Sa'ijovo'ego ëhuro ë kavuë'e ijo bajo jovohuro kö va'ëne sa'are oterohoromo e'u va'ëne ruhibe rojomojuvo a buno gëvaruëhi ë jovo hesi ëgoho ëmino'e jiohijo. O hesi börömoho 300 kilometre jiohijo.

**Ijo tugoho'i majare God-are i'u sa'a rajo bojëmi'iröhëro
anerae 7 jabuhu rama ujuohare jöhoje.**

15 ¹Ĕhi'amu gavodeje noehu bogo gavaruëhi jië'e mu börömo böröme ö'idöre jiamu. Ja'o ga'ibejane tiö'ibejane. Ĕhesi bëhoho anerae aho'obëhe 7 jaburo a bövi bise'o ijumo'amo'iröhe inömo sisëho ujuoho ruehijo. Ĕinömo sisëho rue'iramu ëhuro God dë vörönimobe rovadoho barë'ë'e. Ĕhuni ë inömo sisëho ijo tugoho'i a bövi bise'o ijumo'amo'iröhe inömoho jiohijo.

²Ĕhi jio'i röhu gavodeje jovo e'u deri va'ëne börömo böröme jiamu. Ĕë'u va'ënire vënëro ravanovoromo kavuohijo. O ë e'u va'ëne hesi riröre ae riravohijo. Urimoho ë ariböviohuro biririvoromo mi sisëhu'o hesi nu ano'o va'ëne inömohu'o ëho jabesi muoho jöho bogo ejëhoromo mi sisë hesi ihoho sinoroho bogo bae'i ruahö'öjareje. Ĕariböviohuro God-hu i'imëmade gitaho ujuohë'e e'u va'ëne ë hesi riröre riravohijo. ³Gitaho ujuohë'e riravoromo God-are mu vaejahaje ae Moses-are jöho ioromo God-are Sheep Harihu hesi jöhu'o ioromo uvoruomohijo:

Bada God ja daruge aho'o baejë'e ae javajëjo.

Jasi muoho masije ma-mabëhe höjo.

Ja böröme namiromu sa'ae aho'o muebejavuanue ae javajëjo.

Jasi muoho bogo sareri'ehu jio'i ma-maemu jio'amajëjo.

⁴Bada raro ja bogo böröme hö uehorovo'ajëjo.

Raro jasi ihoho bogo döroho bamo'ajëjo.

Ja gemu ma-maemu javajëjo.

Sa'ae aho'obëhe rueromo jasi örire rajahiruomohijo

jasi mu ma va'orahoro jio'amajohuni.

⁵Ĕhi'amu gavodeje ö'idöre God-hu jiajire niögu javu maho jiovë'e jiamu. ⁶Jiovë'e jiamu gagorovo naehu avevejö'e uëvode aneraho 7 ë osare jië'ëro ma-mabëhe ajivë'e sanu'e niögoho io'amë'e vinebire gold-ëro muoho taemo'amë'e suorovoromo ruehijo. ⁷Rue'ego God rajahijarue

maje 4-ho röhu gemuëro anerae 7 jabesi örire gold'e hevöho 7 ëhi anerae gemu gemu bojëmibe va'ohijo. Ëhevö gagoho God-hu a i'u bojëmi'iröhe vöröhuro irijiom'o'amë'e jiohijo God ioro'ioemu hijaje a hesi vöröhuro. 8 Röhu God-are ajohu'o darugohu'o ë hesi u'ohuro God-are osa mare u'ivoromo rumorovohijo. Ae gö ë God-are osa maroho bogo rumo va'o varijënoho jiohijo. Hujeji anerae 7-ho jaburo a bövi bise'o ijumo'amo'iröhe mue 7-ho vae barë'iramu evare va'oruomo'ë'e.

**Anerae 7-ehu God-are vöröe ramare jio'amajoho
otehö'öjamu sa'are raromarue ariböviehu huë vavaeni
sisë baebe rovamu John-hu gavade jöhoje.**

16 ¹Ëhi'amu hejodeje God-are osa mare anerae aho'o 7 jabesi örire ma-darugo'o uëvavamu: Va'oromo God-are vöröe ramae 7-re jiajoho sa'aro otehö'öhëjo.

²Ëhi uvo'ego anerae 1-ohuro va'oromo hesi övore ramare vöröho sa'are otehö'öhijo. Otehö'ö'ego mi sisë hesi iho sinore jajivëhoromo mi sisë hesi nu ano'o va'ëne inömo rajaharue aribövioho vi'ehi'e sagoho sagoho sisëho baeruomohijo.

³Sagoho sagohoho baeruomamu urimo anerae gemuehu ramare vörö otehö'öjadoho röhu number 2-ohuro ramare vöröho sö jovore otehö'öhijo. Otehö'ö'ego sö jovoho vuov'e a jabesi kö va'ëne jio'amohijo. Jovoho kö va'ëne jio'ego jovore jijiharue majoho aho'o vuovo barëhijo.

⁴Vuovo'ego urimo anerae niö'iehu vörö otehö'öjaroho röhu number 3-ohuro ramare vöröho otehö'öhijo. Otehö'ö'ego rova'o'amë'e jovohu'o sa'a gagore rojomaje jovohu'o körae'amohijo. ⁵Ëhi'amu naro hejodeje jovo muebejaje anerahuro uavavamu: O asë'e God urimë'i jiobe rovanoho avevejö'oho ëhi javajëjo. Ja a maemu javajëjo. Jaehu a gëromo ëhi jië'e i'u mana bojëmijanuoho iae mae höjo. ⁶Nume aribövi sisëhuro jasi jö baeromo majëhijarue ariböviohu'o jasi aribövi ma ioro'iorohu'o muo'amamu jabesi köho rovade höjo. Jabumëro jasi aribövioho muo'amamu köho rovë'ego ëhuni jero jabesi örire köe mana bojëmijane höjo ue'aho'iröhego. Jabumë sisë'i ë'arohuni ëhuni ëhi jië'oho iae mae höjo. ⁷Ëhi ua'ego God-ni suvuoro vënehu buejharue maratuore uavavohijo: Io'ajo. Bada God ja daruge aho'o baejë'e ae javajëjo. Jaehu a gëromo i'u mana bojëmijanuoho ëho bogo mu sisëho vae'iro iae mu mae vaejanue höjo.

⁸Ëhi uvo'ego urimo anerae niö'i gemuehu vörö otehö'öjaroho röhu number 4-huro ramare vöröho maja nunire otehö'öhijo. Otehö'ö'ego God-ro maja nuni hesi öroho bogo tugohohijo majaëro vörö'iraeromo ae aho'o jabesi sino haho'oho vënëro ravëvanovoröhego. ⁹God-ro maja nuni hesi öroho bogo tugohë'ëro majaëro sisë maro nijëmiromo vënëro ravëvanovo'ego ë i'u nugö'öjade aho God agoruomohijo. Jabumë jabesi

mu sisëho bogo vuonugoromo bogo uvoruomohijo: God-are ihoho böröme höjo.

¹⁰ Ëhi'ego urimo anerae ëhi niö'i ëhi niö'iehu vörö otehö'öjaroho röhu number 5-huro mi sisëhu börömo vaeromo hijaje hesi döre ë ramare vöröho otehö'öhijo. Otehö'ö'ego ë mi sisëhu muebejaje öri ari'oho ramoramovohijo. Ramoramovo'ego ae aho'obëhe hara'uoromo anëro bitaroho ja'ihorovo'amohijo. ¹¹ Anëro bitaroho ja'ihorovo'amë'ëro jabesi vi'ehohu'o sagoho sagohohu'o uehorovoromo ö'idöre hijaje aho God hesi örire agoruomohijo. Jabumë mu sisë vaeruomadoho bogo uehorovoromo vuonugoruomohijo.

¹² Ëhi'ego urimo anerae övo gö minehu vörö otehö'öjaroho röhu number 6-huro ramare vöröho rova'ë'e jovo böröme Euphrates-are döre otehö'öhijo. Otehö'ö'ego jovoho sinihohijo ëhuro ruhe maja rojomajinö jioromo rueröhe a masijo jabesi öroho jiovëhego maro rueromo muorovoruumoröhego. ¹³ Ëhi'amu naro gavodeje aru'aho sisë niö'i gemu vahuno va'ënoho göhuro sigobu börömo hesi jö'ore jioromo göhuro mi sisë hesi jö'ore jioromo göhuro sareri'e aru'aho'e jö majëhijaje a hesi jö'ore jioromo suorovoromo rueruomamu. ¹⁴ Ëaru'aho sisëho jabumë Satan-are anera sisëro jioruomë'ëro bogo gavarue darugo'e muoho vaeruomajeje. Darugo'e muoho vaeromo sa'ae dinö'e dinö'e va'arueje sa'are masijo vaejarue aribövioho aho'obëhe gagovëvego daruge aho'o baejë'e aho God-are maja börömoho rovego muorovoruumoröhego.

¹⁵ Röhu Iesuro uve: Jöe hehëjo. Naro vajiohu'e aëro ö'anovo'ie'ajëjo. Ëhuni ae rahu nune jioromo niögu avo'avoho mueberovë'oho iae mae jioruomö'ajëjo. Ëhi jië'oho bogo ma-sinëremuoho a nuniroho jijihoromo javojoho baeruomö'ajëjo. Iesuro ëhi uve.

¹⁶ Amo ë aru'aho sisë niö'i gemu jaburo sa'a muebejarue a masijoho sö ujuhëvo rueromo öri ari'o ihe Hebrew jöehu uvaruoho Armageddon ë gagovëvohijo.

¹⁷ Gagovëvo'ego urimo anerae övo gö mine övo göre gemuehu vörö otehö'öjaroho röhu number 7-huro ijo tugoho'i ramare vöröho sa'anö otehö'öhijo. Sa'anö otehö'ö'ego God-are osa börömore jiaje röho mare uvavohijo: Iae barëjë'e höjo. ¹⁸ Iae barëjë'e hö uvo'ego baderivoromo vajeri varuru'e vaeromo sa'aho sisë maro hijiohijiovohijo. Aevoromo aehu sa'are raromobe rovaroho sa'aho bogo ëhioho darugo'e maho hijiohijiovo'i ma-bisemu jiove rovadeje. ¹⁹ Sa'aho hijiohijiovo'ego amo börömoho niö'i gemu tariorovobe va'ohijo. Tariorovobe va'ego ame gö gö sa'ae dinö'e dinö'e jio'amajoho sisë'ë'amohijo. Röhu God-ro amo böröme Babylon hesi sisëho bogo rumonimo'i vörö'iraeromo i'uoho amo rajoho bojëmihijo ëhuro aehu vörö'e jovo ue'ahoromo hara'uaruëhi ë i'uoho baeromo ëhi hara'uoruomoröhego. ²⁰ Ëi'uoho bojëmi'ego sa'a dirö dirö'e jio'amajoho dahore aho'obëhe sisë'ëromomo ëhi va'o barë'amohijo.

²¹Röhu ënëro direjohi'amë'e masijo masije ruvebihijo. Ëhesi i'uoho gemu gemu 50 kilo rabu'e jio'amë'ëro ëhuro ruvebiromo ae taemo'amoromo ijumëvohijo. Sisë maro ijumëvo'ego jaburo God agoruomohijo.

Ön'öle juvaje magonaho börömo hesi jöhoje.

17 ¹Ëhi'ego anerae aho'obëhe 7 rama ujuoharoho röhu gemuëro rueromo uehijo: Rovego na röjahego ön'öle juvaje magonaho börömehu i'u baejajoho gavëjo. Ëmagonahoho ruë numë jovemu jië'e öri ari'ere hijaje höjo. ²Urimë'i a masije aho'obëhe sa'ae din'öle din'öle muebejaruoho ëho jaburo ë magonahoho sihonövare höjo. O ae aho'obëhe sa'ae din'öle din'öle raromaruoho ëho jaburo hesi jöho ejahoromo hesi vör'öle jovoho ue'ahoromo simane sisërëromo hu'o mu sisëho vaenövare höjo. Ëhuni rovego na röjahego huhu i'u baejajoho gavëjo.

³Ëhi uenugoromo God-are Aru'ahohuro nasi simanoho huotovehamu ë anerahuro na baejevoromo a rumo'e sa'are ruehijo. Baejevoromo rovamu naro gavodeje magonahoho sino kavuë'e mi sisë hesi döre hijamu. Röhu mi sisë hesi sinore iho sisë God agaruoho jajivo'amë'e jiohijo. Hesi simanoho aho'obëhe 7 jio'amohijo. Hesi danoho aho'obëhe 10 jio'amohijo.

⁴Röhu ë magonahohuro kavuë'e niöge nu ano'e gö gö jië'oho ruahë'e gold mabëhëro aj'i'e munë mabëhëro nieniae gö gö mabëhëro ëhuro gurasijiomoromo avohorovë'e hihijo. Hiromo gold'e enatuoho övëro ma'enhijo. Ëenatu gagoho ë magonahehu va'inumi'e mu gö gö vaejaje ë hesi va'inumohuro irijiomë'e usihö'e sisë bëhe jiohijo. ⁵O magonaho hesi ihoho hesi varijore uhu'e jajivoromo uvë'e jiohijo: Ave magonaho hesi bëhoho amo börömoho Babylon höjo. Ön'öle jijiharue mu gö gö vaejarue sa'ae din'öle din'öle raromarue aribövi jabesi vëmoho höjo.

⁶Röhu na gavodeje ë magonaho hesi simanoho huotorovoromo sisërëjë'e jiamu ë hesi bëhoho huro God-are ariböviehu Iesuarë jö birivoromo majëhijaroho muo'amoromo jabesi köho ibe rovë'ëro. Ëhu'ëro jië'ëro simanoho sisërëjë'e jiohijo.

Simane sisërëjë'e jiamu gagorovo na tiötioëvadeje. ⁷Tiötioëvamu gegorovo rue anerahuro uehijo: Ja rabëni tiöjanuëjo. Ëmagonaho hesi uhu jöho o magonahehu döre hijaje mi sisë simane 7 o dane 10 jiajoho ë mi hesi uhu jöho huruoho majahi'ie'ajëjo. ⁸Jaehu gavane mioho urimo namijade höjo. Röhu avevejö'oho bogohöjo. Röhu u'emu gua ëgobövi sa'a gagore jio rojomö'ie'ajëjo ijonö sisëro va'iröhëro. Rojomö'iramu sa'are raromarue ariböviohuro tiöromo jöe barëjëvo'ajëjo. Urimë'i ö'idö sa'a bogo bamadevare evare God-ro maro raromemu raromö'iröhe surire a ioro'ioro jabesi ihoho jajivo'i a ioro'ioro jabesi ihoho bogo jajivo'amade höjo. Jabesi iho bogo jajivo'amade ariböviohuro ë mi sisëho garomo tiöruomo'ajëjo. Ëhesi bëhoho ë mioho urimo namijadoho avevejö'oho bogojiajoho röhu ijonö röhu maho jio'a'ajëjo. Iae ëhuni tiöruomo'ajëjo.

⁹Röhu ae rahu ave jöho avo'avoho uehorovoromo simano mae baeromo bëhi nahë'oho ave nasi uhu jö hesi bëhoho biroho'aruëjo. Eëjövode mi sisë hesi simane 7 ëho jabesi bëhoho dahore aho'obëhe 7 hesi jöho höjo. Eëmagonahohuro ë dahore aho'o 7 jië'e hesi döre hijanovaje höjo. Röhu simane 7 jabesi bëhoho gö sa'are masijo vaejarue ae 7 jabesi jöho höjo. ¹⁰Övo gö mine rireromadoho gemu avevejö'oho daruge jioromo hi'i röhu gemu gö'o bogo rovë'e höjo. Rovë'iroho iae majae ma-bisemu hi'a'ajëjo. ¹¹Röhu mi sisë urimo namijë'ëro jaruvo bogojiaje hesi bëhoho a masije 7 jabesi jö uavode röhu ë hesi ijore number 8-ehu rueröhe hesi jöho höjo. Röhu ëho urimo riravobe rovarue a masije 7 jabesi ae gemuoho jio'a'ajëjo. Röhu hu sisëro va'a'ajëjo.

¹²Röhu mi hesi dane 10 gavanoho ë hesi bëhoho sa'a muebejarue a masije 10 jabesi jöho höjo. Röhu avevejö'oho mueberuomo'iröhe öri ari'oho bogo baerumë'e höjo. U'emu bae'a'aruëjo. Jabesi muebe'iröhe öri ari'o baejë'iroho evare a muebejëvo'iröhe darugoho bae'a'aruëjo mi sisëhu'o gemu mae masije riravoromo ae muebejëvego majae ma-bisemu jioromo evare ë darugoho barëjëhoröhego. ¹³Eë masije aho'obëhe 10 ëho jaburo uehore gemu bae'a'aruëjo. Uehore gemu baeromo jabesi darugoho aho'o mi sisë hesi örire gemu bojamiromo ajaminövo'aruëjo. ¹⁴Mi sisëho ajamiromo ri'öromo God-are Sheep Harihohu'o muorovo'aruëjo. Muorovo'iramu Sheep Harihohuro mana muorovëmiromo jabumë ruahö'öjëvo'ajëjo ë hesi bëhoho huro masijo vaeruomaje ae aho'o iosirëmiromo hu gemu döroho jië'ëro. O huhu baejëvo'i uehorovëvoromo hesi baejëvade ariböviehu hu gemu biririvoromo uehorovarue ë aribövioho jaburo Sheep Harihohu'o gemuoro bimuvoromo muorovoromo sisëho ruahö'öjëvoruomo'ajëjo.

¹⁵Anerahuro ëhi ueromo uehijo: Önö'e juvaje magonahehu ruë numë jovemu jië'ire hijamu gavane jovo hesi bëhoho ae aho'obëhe sine gö gö huë gö gö sa'ae dinö'e dinö'e raromarue aribövi jabesi jöho höjo. ¹⁶Röhu mi sisëhu'o hesi dane aho'obëhe 10 ga'amanoho ëhu'o jaburo huotorovoromo ë önö'e juvaje magonahoho nue huodivoromo ijumo'aruëjo. Ijumoromo niögu siri'oho jahaho'amö'iramu dë'ahobatëremu jio'iramu ëhi nugoruomo'ajëjo. Dë'ahobatëremu nugonugoromo hesi sino ioro'ioroho ue'aho'i ioro'ioroho vëniro huoruomo'ajëjo. ¹⁷Eëhi ë'iröhe hesi bëhoho God-ro uehore ë danoho simanore bojëmijade höjo ehuro huhu nimaje muoho vaejahoruomoröhego. Huhu nimaje muoho jabumëro vaejahoromo simane gemuoho uehorovoromo mi sisëho jabesi darugoho aho'o bojamiromo ajamijego ë mi sisëhuro bövie namiromo öri ari'oho muebebe va'ego evare God-hu rabe rabe uëvadëhi ëhi jioröhego.

¹⁸O jaehu gavane magonaho hesi bëhoho iho'e amo börömoho höjo. Eëamohuro sa'ae dinö'e dinö'e muebejarue a ioro'ioroho muebe'amarue höjo.

Amo sisë Babylon ma-ioro'ioeremu sisërë barë'iröhe jöhoje.

18 ¹Ëhi'amu gagorovo gavodeje anerae gö ö'idöre jioromo ruvebijamu. Hu darugo böröme bæjè'ëro ruvebi'ego hesi ajohuro sa'ae aho'obëhe ajivo'amohijo. ²Sa'ae aho'obëhe ajivo'amo'ego ma-darugo'o uvohijo: Amoho barëjè'e höjo. Iho'e amo börömoho Babylon vejö'oho barëjè'e höjo. Avevejö'oho ë amoho Satan-are anera jabesi ame höjo. Aru'aho sisë jabesi öri ari'e höjo. Va'inumi'e ugo sisë ihe göëro göëro ë raromo jijiharue höjo. ³Ëhesi bëhoho ëhi höjo. Aehu magonaho hesi vörö'e jovo iromo simane sisërëromo hu'o önö'e vaejarue ëhi jië'e mue gemuoho ë amo rajoho jaburo sa'ae aho'obëhe røjëhijare höjo. Aehu magonaho'o önö'e mu vaejaruëhi sa'are a masijo ömo'ömhuro ë amo gemuore bimuvoromo javoji'e mue gö gö vaejare höjo. O Babylon amo rajohuro mahunö'e raromoromo bövie bise'e imo'i nimare höjo. Ëhi nimè'ëro inömo imo'amarue ariböviohuro sa'ae göro göro jioromo rueromo ë amore jabesi inömo imoromo ëhuro moni ma'e jëvade höjo.

⁴Ëhi uvavamu hejë'i hejodeje ö'idöre huë gö uvavamu:

Nasi aribövioho ë amore raromarujoho vuonugo'i ruehëjo ëhuro ë amo rajo jabesi gemuoroho bogo bimuvoromo mu sisëho vae'irarije höjo.

O jabuhu i'u baeruomajoho jemë bogo bæ'irarije höjo.

⁵Ëamo rajehu mu sisë börömo bëhe vaebe rovaroho God iae uehorovajëjo i'ue bojëmi'iro.

⁶Amo rajehu mu sisë vaeruomadëhi jemëro i'uoho mana ëhi bojëmiromo röhu gö'o döro börömo bëhe bojëmirëjo.

Jabuhu a ioro'ioro vörö'e jovo bojëmanovamu ue'ahoromo ijumorovarëhi

jemëro ëhi mana bojëmirëjo.

Röhu vörö ma-ma'e jovoho bojëmego ue'ahoromo ijumorovo avoho'irarëjo.

⁷Urimo amo rajehu nimoronimorohë'i jijihoromo mahunö'e raromarëhi i'uoho mana ëhi bojëmego hara'uoromo huë vavaene baeruomo'irajo. Magonahehu sarerivoromo uvajëhi: Na magonaho börömëro jevè'ëro dö maro hijaje höjo.

Na bogo doruoho hijaje höjo.

Bogo mae bogo huë vavaenoho bæ hesi jevajë uvajëhi ë amo rajohuro ëhi gemuoho sarerivoromo uehorovoromo uvoruomaje höjo:

No masije javuajëjo.

⁸Ëhuni majae gemuore jabesi i'uoho aho'obëhe ma-majioho rue barë'iramu sisërëjëvo'ajëjo.

Ae guomo guomo sisë baeromo vuovëvo'ajëjo.

Huë vavaene böröme jabesi örيره rue'a'ajëjo.

Hömo majae rue'a'ajëjo.

Vënëro ravëvo barë'ajëjo

ë hesi bëhoho jabumë mevo gëromo i'u bojëmaje aho Bada God-are darugoho börömëro jië'ëro.

⁹Röhu sa'a gö gö a masijohuro ë amo rajohu'o bimumoromo javoji'e muoho vaeromo hesi inöme marohë'e mae ujuohoromo mahunö'e raromë'ëro garöhe amoho vënëro ravoromo u'ivo ajiomo'iramu garuomoromo amo hesi jöëni vavaenimoromo nierusuburu'e bamoruomo'ë'e. ¹⁰Nierusuburu'e bamoromo ë amore huë vavaeni börömo baejaruoho garomo juhuonivoromo rori'o ëgoböviro riravo'ë'ö. Riravoromo uvoruomo'ë'e:

Babylon vaevë'e amo börömohajo.

E-e vaevë'e biriri'e amohajo.

Jemesi i'uoho ma-majioho baejë'e jëvajëjo.

¹¹Ëhi uvoruomo'iramu sa'ae dinö'e dinö'e raromoromo inömo imoromo moni mana ujuoharue ariböviohuro ë amo hesi jöëni vavaenimoromo nierusuburu'e bamoruomo'ë'e. Ëhesi bëhoho urimë'i ë amo rajehu imo'amarue a jabesi inömo imo'amoromo moni bojëminövaroho ë i'u baeröhe majare evare iae barë'ë'e. Barë'iramu ae bogojjë'ëro jabumë inömhoho bogo imo'amoromo monioho bae'ë'ö. ¹²Jabesi gold silver munë gö gö maho nienia maho bogo imo'amoromo monioho bae'ë'ö. Sanuovë'e niöge kavuë'e nu ano'e gö gö ëhu'o bogo imo'amoromo monioho bae'ë'ö. Ridi'e ije nu ano'e gö gö ëhu'o bogo imo'amoromo monioho bae'ë'ö. Inömo inömo mi danehu avoho'amaroho ijo maehu avoho'amaroho rövë'e munë maehu ajaniehu munë nu ano'o göehu göehu avoho'amaroho ëhu'o bogo imo'amoromo monioho bae'ë'ö. ¹³Rihu'e i maho ridi'e oso ihe gö gö vëniro buejego ridivajoho o sino avohorovaruoho o mu rabe rabe vaejaruoho ëhu'o bogo imo'amoromo monioho bae'ë'ö. Wine jovoho olive ijo bajo jovoho flour-ho wheat-ho cow-ho sheep-ho horse-ho ëhu'o bogo imo'amoromo monioho bae'ë'ö. Maratu mabëhe horse-ehu jagu bava'aruoho ëhu'o bogo imo'amoromo monioho bae'ë'ö. Ae magonahe aru'aho'e jioruomajeje röhu mahu mi'o ë'aruëhi ëhi guduamo'amoromo imo'amarueje ae gö jabesi muemu vaeröhego. Ae magonahe mi va'ëne imo'amaruëhioho ëhioho bogo imo'ë'ö. Ijonöho aho bogo imo'amo'iramu ëhuni imo'amarue ariböviohuro nierusuburu'e bamoruomo'ë'e. ¹⁴Nierusuburu'e bamoromo uvoruomo'ë'e: Vaevë'e amoho ijo baje gö gö i'i ganiganiëgajoho iae barëjëhë'e höjo. Jemë inöme marohë'e mae o bövie bise'e ajivë'e ma-mabëhe jëvadoho sisërëjëhë'e höjo. Dinö'e röhu maho bihorëjo. ¹⁵Iae ë inömo amo rajo jabesi örيره imo'amoromo mana marohë'e ma ujuoharohuro ë amo rajehu huë vavaeni vi'ehi börömo baejaruoho gëromo juhuonivë'ëro rori'o ëgoböviro riravo'ë'e.

Ēgoböviro riravoromo huë vavaene baeromo nierusuburu'e bamoruomo'ë'e.

¹⁶Nierusuburu'e bamoromo uvoruomo'ë'e:

E-e vaevë'e vaevë'e amo börömohajo.

Sanuovë'e niögu mabëhe kavuë'e ma-mabëhe io'amonövarije höjo.

Nieniae gold-ehu inömo göehu göehu avoho'amaroho
gurasijiomoromo avohorovonövarije höjo.

¹⁷Jaruvoho jemesi inömo marohë'oho ma-majioho ijumëhë'e höjo.

Boat muebe'amarue aribövioho boat ma'enarue aribövioho boat-re raromoromo mu vaeromo moni baejarue aribövioho boat-re va'arue a ioro'ioroho ëho jaburo rori'o ëgoböviro riravoromo ¹⁸garöhe Babylon amoho vënëro ravoromo u'livo ajiomo'iramu garuomoromo ma-darugo'o uvoruomo'ë'e: Sareri amo börömo böröme jiade höjo. Ēhi jië'e amoho urimoho bogojiade höjo. ¹⁹Ēhi uvoruomoromo vavaenimorovoromo tohotohoho jabesi simanore bu'ödivorovoromo nierusuburu'e bamoromo uvoruomo'ë'e:

E-e vaevë'e vaevë'e amo börömohajo.

Boat baeromo sö jovore va'arue ae aho'o noro ë amo rajore nosi
inömoho imëvoromo

manaho marohë'e mae ujuohë'e javuajëjo.

Jaruvoho ma-majioho sisërëj'ë höjo.

Ēhi uvoruomo'ë'e.

²⁰Röhu ö'idö rajoho apostle ömo'ömoho jö God-aro baeromo majëhijarue aribövioho God-are aribövi ioro'ioroho jemëro nimorohore. Ēamo rajehu jemesi örire sisë'i vaejëvaroho God-ro ëho gëromo ë hesi i'uoho mana bojëmij'ëje.

²¹Röhu darugo'e anerae gemuëro munë ha'osi börömo börömoho banigojiomoromo sö jovore bu'ö'ego jovo gagore be'abuehijo. Jovo gagore be'abue'ego anerahuro uvavohijo: Ēmunëhu e'ure be'abuej'ëro ijonö bogo gavaruëhi amo börömo böröme Babylon i'ue baeromo ëhi ma-ioro'ioremu beva'oromo sisërë'iramu ijonöho bogo ga'a'anuëjo. ²²Gita bejaruoho jö iaruoho virikö huosiharuoho hëgö huaruoho ë hesi huëho ë amoroho ijonöho bogo he'a'anuëjo. Inömo javuo bövi bise'o avoho'amarue aribövioho ë amoroho ijonöho bogo birohëvo'anuëjo. I sa'ijovaje munë hunuohunuovo'ego garahörö'e baejajoho ë amoroho ijonöho bogo he'a'anuëjo. ²³Iro bunö'irae'ego ajivajoho ë amoroho ijonöho bogo ga'a'anuëjo. A'o magonaho'o masurovoromo nimoronimoroharuoho ë amoroho ijonöho bogo he'a'anuëjo. Röhu amo rajomë urimo jemesi moni mu vaejarue ariböviohuo sa'a ioro'ioroho iosirëmiromomo masije jëvade höjo. Jemëro sareri sareri'e muoho vaeromo sa'ae aho'o jabesi uehoroho ijumëharije höjo.

²⁴Röhu jö God-aro baeromo majëhijarue ariböviohu'o God-are aribövi ioro'iorohu'o ë amore o dinö'e dinö'e raromaruoho muo'amamu

vuovëvë'oho ë amo rajo jabesi sisë höjo. Iae ëhuni ë amoho sisërë'ajëjo. Anerahuro ëhi uvohijo.

19 ¹Ëhi'amu hejodeje ae aho'o ò'idöre ma-darugo'o uvoruomavamu: God mabëhëjo. Huro gemuëro maroho bamavujaje höjo. Iho börömocho darugo maho nosi God hesiriremu höjo. ²God-ro ae mae o sisë jëvego gë'i avoho mevëvaje höjo. Ëhesi bëhoho ë ön'le juvaje magonaho börömechu sa'ae aho'o javoji'e mu röjëhiromo ijumëvadohuni ëhuni huro mevoromo uavade höjo: Sisë javo'ego sisëro va'a'anuejo. Ëmagonahehu God-are mu vaejarue aribövi muo'amëvadohuni ëhuni i'ue mana bojamijë'e höjo. ³Ëhi uvoruomoromo röhu maho uvoruomohijo: God mabëhëjo. Ëamo börömocho vënehu ravaje u'oho ëhi ma-ajiomemu ajiomö'ajëjo. ⁴Ëhi uvoruomö'ego rue a duvahe aho'obëhe 24-ho o God rajahijarue maje 4-ho jaburo sa'are ague aho raromoromo God-hu röho mare hijajoho rajahiromo uaruomohijo: Ëjöho iae mae-ëjo. God mabëhëjo.

Masu'iröhe söro God-are Sheep Harihehu bae'iröhe jöhoje.

⁵Ëhi uvoruomö'ego God-are röho mare uvavohijo: Nosi Börömocho God mabëhe uarëjo. Hesi mu vaejharuje hu uehorovaruje aribövi masijohu'o ininohu'o aho'o hesi öröro huë mae uarëjo. ⁶Ëhi uvoruomamu hejë'i naro hejodeje ae aho'obëhe uvorovaruëhi jovehu ruomoromo uvajëhi varurehu anego hejaruëhi ëhi uvoromo uvavamu: God mabëhëjo. Bada nosi God daruge aho'o baejë'e ahuro böröme namijajëjo. ⁷Ëhuni ë'ego no huë mae baeromo nimoroharëjo. Hesi ihoho mabëhe uavarëjo. Ëhesi bëhoho God-are Sheep Harihehu masu'iröhe majaho rovë'e höjo. Huhu masu'iröhe magonahohuro avohorovë'e höjo. ⁸God-ro sanuovë'e ajivo avohë'e niögöho bojamamu ba'amë'e höjo. Ëhi uvoruomavohijo. Röhu sanuovë'e niögu hesi bëhoho God-are ariböviehu mu ma vaejarue hesi jöhoje.

⁹Ëhi'ego ë anerahuro uehijo: Ave jöho jajivoromo uvonëjo: Ae rahu hejë'oho uëvamu: God-are Sheep Harihehu masu'iröhe söroho ro ihë uëvamu hejë'oho huë mabëhe jioruomö'ajëjo. Ëhi uenugoromo uehijo: Ave jö hejanuoho God-are jö maho höjo. ¹⁰Anerahuro ëhi uëvamu hejë'i naro hu uvene aho röjahi'irögöro hesi höru'ere ague aho hijodeje. Hiromo rajahi'irögöro ë'amu gegorovo uehijo: Bogave ëhioho ë'iranëjo. Jaehu God-are mu vaejanue ëhi jïë'e mu vaejaje ae jevajëjo. O jasi ö mueno'ohu'o Iesuare jö mae uehorovoromo majëhijaruoho jabuhu Badare mu vaejaruëhi na'o ëhi ë'aje ae jevajëjo. Ëhuni nadi na rajehi'i God gemu rajahijëjo. Ëhesi bëhoho Aru'aho gemuohuro jöe bojëmë'ego aëro ijönö jioröhe jöho majëhinövare höjo o avevejö'oho Iesuare jöho majëhijarue höjo.

Mu Ma Uehorovaje Aehu sino ajivë'e horse-re hiromo va'oromo sisë ariböviohu'o muorovade jöhoje.

¹¹Ëhi uëvamu gavodeje ò'idöho jiovë'e jiamu. Jiovë'e jiamu gagorovo gavodeje ae sino ajivë'e horse-re hijamu. Ëa hesi ihoho Birivoromo

Mu Ma Uehorovaje Ahoje. Hu mevoromo gövuaje a mae o sisë javuego gövuajoho ëho huro mae uehorovoromo ë'ajeje. O muorovajoho ëhu'o huro mae uehorovoromo ë'ajeje. ¹²Röhu hesi nunoho vënëro höduvanovohijo. O hesi simanore a masijehu didi'aruëhi jië'e bosöho aho'obëhe didi'o'amë'e jiohijo. Röhu hesi sinore ihe jajivë'e jiohijo. Ae gö ë iho hesi bëhoho bogo ga'i hesi huro sivue gavajeje. ¹³Hu köëremu jië'e niögoho ba'amë'e jiohijo. Röhu hesi ihoho God-are Jö jumuvë'ohoje. ¹⁴Röhu ö'idöre jioruomaje muorovo ariböviohuro aji buse jië'e sanuovë'e niögoho io'amoruomë'e sino ajivo'amë'e horse-re raromoruomohijo. Raromoromo ë a börömo hesi ijore ijore jijihoruomohijo. ¹⁵Röhu ë a hesi jö'ore anio ma'e kaejöhö jiohijo ëhuro God bogo uehorovarue aribövi sa'ae dinö'e dinö'e raramaruoho ruahö'öjëvoröhëro. Ruahö'öjëvoromo hujejo ha'itoho baeromo vörö'o muebejëvo'ë'e jaburo hu gemu ejahoruomoröhego. Muebejëvoromo aehu kavuë'e ö'i bajo munë guorötore hörehu taemotaemovoromo sa'ijovo'amaruëhi huro sisë aribövioho ëhi hörëro taemotaemovo'amo'ë'e. Èhesi bëhoho daruge aho'o baejë'e aho God-hu dë vörönimego vörö röjëhiromö i'u bojëmijaje jöhöje. ¹⁶Röhu hesi ahihonö niögu döre ihoho jajivoromo uvë'e jiohijo: Masijo vaeruomaje ae aho'o iosirëmiromö hu gemu döroho höjo. Èhi jajivë'e jiohijo.

¹⁷Èhi'amu gavodeje anerae gemu maja nunire namijamu. Namiromö döre bioromö va'arue ugoho aho'obëhe ma-darugo'o uëhijo: God sörö böröme bamajëjo. Rueromö gemuoro gagovöhëjo ¹⁸ëhuro sa'are masijo vaejarue a jabesi birogoho iromö muorovo a masijo jabesi birogoho darugo'e a jabesi birogoho horse jabesi birogoho horse-re va'arue aribövi jabesi birogoho mae o sisë'i rarumarue aribövi jabesi birogoho a masijo o a ino jabesi birogoho ëho i'amo'irarije höjo. Èhi uëhijo.

¹⁹Röhu gavodeje urimö gavode mi sisëho o sa'ae dinö'e dinö'e masijo vaeruomaje aribövioho o jabesi muorovo aribövioho ëho jaburo ë sino ajivë'e horse-re hijaje a börömo'u'o hesi muorovo ariböviohu'o muorovo'i gemuoro gagovë'e jiamu. ²⁰Muorovo'ego horse-re hijaje a börömo'u'o hesi muorovo ariböviohu'o ëho jaburo mi sisëhu'o mi sisë hesi sareri'e aru'aho jö majëhijaje ahu'o ëhi guduamo baejëvo va'ohijo. Urimë'i ë jö sareri'e majëhijaje ahuro mi sisë hesi jöho ae sarerëmiromö darugo'o majëhiromö mi sisëhuni röromö noehu bogo gavarue darugo'e muoho vaenövadeje. Darugo'e muoho vaeromö ëhuro aho sarerëmi'ego ae rahu mi sisë hesi iho sinore baeromö hesi nu ano'o valëne inömo avoharoho uvene aho röjahijë'ohö guaro rireromö va'onövareje. Amo ë sareri'e aru'aho jö majëhijaje ahu'o mi sisëhu'o guduamëvoromö bogo anëgo'i ma-babu'öjëvo'ego vënehu munë ravoromö girosijiomoromö e'u börömo valëne jiajire ë bejëvo va'ohijo. ²¹Bejëvo va'ego jabesi muorovo aribövi sisëho horse-re hijaje a börömo hesi jö'ore jioromö höröjade kaejöhuro

muo'amohijo. Muo'amo'ego uge aho'obêhe ë aribövi jabesi birogoho ue'ahê'ëro dë bajo'e jio'amohijo.

**Satan gua gagore vadune ëgobövie hi'iröhego tövoromo
gua gago ëgobövire ba'amamu John-hu gavade jöhoje.**

20 ¹Naro gavodeje aneraho ö'idöre jioromo gua ëgobövi hesi ojo jiovarue key'o biriri'e ö'ohu'o övëro ömëvë'e ruvebijamu. ²Ruvebiromo ë anerahuro ni'l'ivadire jiobe rovade sigobu börömo hesi ihoho Devil o Satan ë sigoboho guduamoromo tövohijo ëhi jiobe va'ojuvo vadune aho'o 1,000 barë'iröhego. ³Tövoromo ë gua ëgobövire ba'amo'ego beva'ohijo. Beva'ego ojoho tugohonigivoromo sivaëro badihi taemohijo ëhuro hu bogo höröromo urimo ë'adëhioho sa'ae dinö'e dinö'e raromarue aribövioho sarerëmibe va'ego vadune aho'o 1,000 barë'iröhego. Röhu vadune aho'obêhe 1,000 barë'iramu evare ojoho jiovaho'iramu iae höröromo hibe juvoromo majae ma-bisemu barë'iramu evare barë'ë'e. Ëhi jio'ë'e.

⁴Ëhi'amu gavodeje a masijoho röho mare raromamu. God-ro urimo uëvamu darugoho baeruomadeje ae mevëvoromo gëröhëni mae o sisë jëvego. Ëaribövioho röho mare raromoruomohijo. O gavodeje a ioro'ioro jabesi aru'ahoho jio'amamu. Urimë'i ë ariböviohuro sa'are raromoromo God-are jö Iesuhu majëhijadoho ae majëhibe jijihamu gagorovo aëro ë mu maho bijönimoromo sönöe tarivëhamu vuovëvadeje. Vuovëvë'ëro ë aribövi jabesi aru'ahoho gëvodeje. Urimë'i ë aribövioho jaburo mi sisëho o ë mi hesi nu ano'o va'ëne avohare inömo bogo uvene aho röjëhijareje. Ëmi sisë hesi ihoho varijore o övore jajivëho'iröhoho bijönëgamu bogo baejareje. Bogo baejë'ëro vuovoromo i'ovë'ëro Keriso'o gemu mae masije vaejuvo vadune aho'obêhe 1,000 barëhijo. ⁵A ioro'ioroho bogo i'ovo'i ma-vuovo momorö'öjuvo vadune aho'obêhe 1,000 barë hesije. A'i naehu gëvode aribövioho i'ovoromo ri'öj'ëe raromoruomohijo. Jabuhu i'ovoromo ri'öjare hesi bëhoho urimo ri'ö'iröhe majahoje. ⁶Urimo i'ovoromo ri'ö'iröhe aribövioho huë mae jëvo'ë'e. God-are aribövi maho jëvo'ë'e. Urimo vuovëvadoho röhu maho bogo vuovoromo sisëroho va'i a'i God-are o Keriso-are priest muoho vaeromo Keriso'o gemu mae masije vae'iramu vadune aho'obêhe 1,000 barë'ë'e.

Satan ruahö'öromo vëni ravajire ë bu'ö'iröhe jöhoje.

⁷Vadune aho'obêhe 1,000 barë'iramu Satan jiovo nugö'ö'iramu höröromo va'ë'e. ⁸Hörö va'oromo Gog sa'are Magog sa'are sa'ae dinö'e dinö'e ae sarerëmibe muorovojöro gagovëvobe va'ë'e. Sarerëmibe gagovëvobe va'iramu ae aho'obêhe muorovo'i gagovo'iramu nie'u va'ëne jio'ë'e. ⁹Nie'u va'ëne jië'ëro sa'ae bövioho ruë numë tagavoromo God-are aribövie hesi amo börömore riravaruoho muorovëmi'i numëvo'ë'e.

Numëvo'iramu vënëro ö'idöre jioromo ruvebiromo ravëvo barë'ë'e.
 10 Ravëvo barë'iramu Satan ë aribövi sarerëmiromo gagovëvade aho babu'ö'iramu vënehu munë ravoromo girosijiomoromo e'u börömo va'ëne jiajire be'abue'ë'e. Urimo mi sisëhu'o hesi sareri'e jö majëhijaje ahu'o ba'amëvego abo rireromo'iröhire ë be'abue'ë'e. Be'abueromo mi sisëho o sareri'e jö majëhijaje aho o Satan ëho jaburo vae majae hara'uemu hara'uobe va'ë'ö.

**Ae aho'obëhe God-are nurire riravego jabesi muoho mae
 o sisë jiego God-hu ma-ioro'ioremu mevoröhe jöhoje.**

11 Ëhi ë'ë'ö. Röhu gavodeje a masijehu raromarue ëhi ji'e ajivë'e röho börömore ae gemu hijamu. Hi'ego aehu huruomo va'aruëhi sa'ahu'o ö'idöhu'o ëhi arua anumiae va'ego röhu ijoho bogojiohijo. 12 Ëhi'amu gavodeje vuovëv'e aribövioho ininore va'o masijore ë röho ma hesi nunire riravamu. Riravo'ego suri surioho jiovo'amohijo. Röhu suri suri göho ëho maro raromemu raromo'iröhe aribövi jabesi iho jajivo'amë'e suroho jiovohijo. O suri suri ioro'ioroho ëho ae aho'o mu vaebe rovere jöho jajivo'amë'e jiohijo. Ëröho mare hijaje ahuro suri surioho adahohijo ga'i di ahuro mu maho vaej'e jiego di ahuro mu sisëho vaej'e jiego. Ëho garomo uëhijo: Mu mae vaej'e javaje manö va'ëjo. Mu sisë vaej'e javaje sisënö va'ëjo. 13 Vuovare aribövi ioro'iorohuro sö jove iromo vuovo momorö'öj'ëro jië'ëro rojomoromo ioro'iorohuro vuovë'e ariböviehu raromaruire ë jioromo ri'öromo rueruomohijo. Rue'ego röho mare hijaje ahuro ae gemu gemu mevo garomo mu mae vaejadoho o mu sisë vaejadoho manaho ëhi bojami'ego baebe va'ohijo. 14 Röhu vuovarue vöröhu'o a vuovego bahijarue öri ari'ohu'o ëhu'o ma-ioro'ioremu bu'ö'ego vënehu ravoromo e'u börömo va'ëne jiajire ë abue'ego ijönöho vuovarue öroho bogojiohijo. Röhu vënehu ravoromo e'u börömo va'ëne jiaje hesi bëhoho ae rahu sisë vaej'ëro vuovoromo ri'öj'ëro röhu maho vuovoromo ë e'u va'ënire abueröhe jöhoje. 15 Ae rahu mae raromemu raromo'iröhe surire hesi iho bogojië'oho ëhi ji'e aribövioho ujuoho ruruhö'ö'ego e'u va'ëne vënehu ravajire ë rireromohijo.

God-hu ö'idö sa'a bövi bise'o i'o avoho'iröhe jöhoje.

21 1 Ëhi'amu gavodeje ö'idö i'ohu'o sa'a i'ohu'o jiamu ö'idö mamiohu'o sa'a mamiohu'o sisërë barëj'ë'ero. Sö jove urimo jiadoho bogojiohijo. 2 Ëhi garomo gavodeje God-are amo böröme hesi ihoho Jerusalem amo i'e ö'idöre God-hu hijajire jioromo ruvebijamu. Magonahehu masu'irögoro baruohuro gajöro sino avohorovaruëhi ë amo i'oho ëhi avohë'e jiohijo. 3 Ëhi jiamu gagorovo hejodeje röho mare ma-darugo'o uvavamu: Jöe hehëjo. Avevejö'oho God-are javu maho a ririö jië'ëro huro a'o gemu mae hinövo'ajëjo. Jabumë hesi aribövie jëvo'i huro

jabu'o gemu mae hiromo muebejēvonōvo'ajējo jabesi Bōrōmēro jiē'ēro.
 4 Muebejēvoromo nuni jovoho miorēho'ajējo. Ijonōho aho bogo vuovēvo'i bogo nivo'i huē vavaenoho vi'ehoho bogo baeruomo'ajējo mu mamioho mami'e barējē'ēro jiē'ēro.

5 Ēhi uvo'ego rōho mare hijaje ahuro uvavohijo: Jōe hehējo. Naro bōvie bise'e i'ēremu bamajējo. I'ēremu bamajē uvonugoromo uehijo: Ējōho bogo sareroho jio'i iae jō mae hōjo. Ēhuni suroro jajivonējo. 6 Ēhi ueromo uehijo: Muoho iae barējajējo. Na urimo ni'i'ivevadoho rōhu ijo tugoho'ioho ēhi gemuoho jevo'ajējo. Mue aho'o aevodoho ēhi vae barē'irodoho jevajējo. Ae rahu huē girihēvē'oho naro sa'a gagore rojomaje jovoho vuoromo suvuore bojēmi'ejōjo ue'ahēgo i'ovēvo'irōhego. 7 Ae rahu mu sisē ruahō'ōjē'oho aviēhi jiē'e huē maho nasi ōrire bae'a'ajējo. Na hesi Bōrōmōho God jevo'i hu nasi harihe jio'a'ajējo. 8 A'i juhuonivoromo mu vuonugarue aribōvioho sareri sareri'e aribōvioho mu sisē gō gō vaejarue aribōvioho a muo'amarue aribōvioho ōn'ō'e jijiharue aribōvioho iro oso'e vaejarue aribōvioho inōmo sisē aru'aho'e hōromo uvēne aho rōjahi'amarue aribōvioho jō sareri'e atarue aribōvioho aho'obēhe ēhi jiē'e aribōvi jabesi ōri ari'oho e'u bōrōmo va'ēne munē vēnehu ravoromo girosijiomajire ē jio'a'ajējo. Ēhesi bēhoho ē aribōvioho mami'e vuovēvadoho rōhu maho vuovoromo ē va'o raromoruomo'ajējo.

Jerusalem amo i'o hesi jōhoje.

9 Rōhu urimo anerae 7 ramare vōrōho 7 otehō'ōjamu evare bōvie bise'e ijo tugoho'i sisērē'amadeje. Mami'e ēhi ē'are anerae aho'obēhe 7 rōhu gemuēro rueromo uehijo: Rovego na rōjahijego Sheep Harihu hesi vaboro i'e masuvajoho gavējo. 10 Ēhi uenugoromo God-are Aru'ahohuro nasi simanoho huotoveho'ego ē anerahuro baejevoromo dō mare ajiomoromo dahoru bōrōmo ēgobōvire ē ruehijo. Baejevo rueromo rōjehijamu gavodeje God-are Amo Bōrōme hesi ihoho Jerusalem ō'idōre God-hu hijajire jioromo ruvebijamu. 11 Ēamohuro God-are ajoho baejē'ēro ēhu'ēro ajivohijo. Ajivoromo ma-mabēhe ajivo barējē'e jiohijo. Munē mabēhe hesi ihe jasper ajivajēhi ēhi ajivohijo. 12 Rōhu ē amo hesi rejoho ēgo ēgobōvi mae jiohijo. Rejo hesi ojoho aho'obēhe 12 jio rova'ohijo. Anerae aho'obēhe 12 oje gemu gemu riravo rova'ohijo. Israel rajo jabesi agane 12 jabesi ihoho gemu gemu ojo ahore jajivo'amo va'ē'e jiohijo. 13 Maja hōrōjajinōho oje aho'o niō'i gemu jiohijo. Maja beva'ajinōho oje niō'i gemu jiohijo. Ruēnōho niō'i gemu viēnōho niō'i gemu ēhi jiohijo. 14 Ēamo rejo hesi uhuroho munē aho'obēhe 12 ruh'e jiē'ēro ēhu'ēro rejoho bibivoromo namihijo. Ēmunē ruho va'are ahore God-are Sheep Harihu hesi apostle ōmo'ōme 12 jabesi ihe gemu gemu jajivo'amo va'ē'e jiohijo.

15 Rōhu na'o jō jōvaje anerahuro gold-ehu avohare vahu baejaruoho ōvoro baejē'e jiohijo amo bōvi hesi vahuoho o amo rejohu'o ojohu'o ēho

jabesi vahuoho bae'iröhëro. ¹⁶Röhu ë amo börömoho ioni göho ioni göho ruhënöho numënöho vahuvojadoho hesi vahuoho ma-gemuoho jiohijo. Anerahuro gold ahoho bava'oromo amo börömo hesi vahuoho vahuvo garomo gavadeje amo hesi ëgoho 2,400 kilometre jio'i hesi bunohu'o döre ajiomadohu'o jabesi vahuoho gemuoho jiamu. ¹⁷O anerahuro amo hesi rejo vahuoho vahuvo garomo gavadeje rejo döre ajiomadoho 60 metre jiamu. Jabuhu vahuvo gavaruëhi ëhi gavadeje. ¹⁸Röhu amo rejoho munë nu ano'o mabëhëro vaejë'e jiohijo. Munë hesi ihoho jasper-je. O amo bövioho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue. ¹⁹Röhu amo rejo bibivo'iröhego rejo uhure bahijare munëho munë mabëhe nu ano'e gö gö avohoromo bahijë'e jiohijo. Munë number 1 hesi ihoho jasper ajivë'e ma-mabëhe jiohijo. Munë number 2 hesi ihoho sapphire nuogu'e ma-mabëhe jiohijo. Munë number 3 hesi ihoho agate mahu guho'e jiohijo. Munë number 4 hesi ihoho emerald röv'e ijo hano va'ëne jiohijo. ²⁰Munë number 5 hesi ihoho onyx hesi nu ano'e gö gö kavuë'e jionövo ajivë'e jionövohijo. Munë number 6 hesi ihoho carnelian kavuë'e jiohijo. Munë number 7 hesi ihoho quartz höv'e ijo hano va'ëne jiohijo. Munë number 8 hesi ihoho beryl ijo hano va'ëne jiohijo. Munë number 9 hesi ihoho topaz hövo avohë'e jiohijo. Munë number 10 hesi ihoho chalcedony rövoromo hövanöv'e jiohijo. Munë number 11 hesi ihoho turquoise nuogu'e jiohijo. Munë number 12 hesi ihoho amethyst rövoromo kavuanöv'e jiohijo. Munë aho'obëhe 12 jabesi nu ano'e gö gö ëhi jio'amohijo. ²¹Röhu rejo oje aho'obëhe 12 jabesi tugoharuoho ëho nienia ha'ose aho'obëhe 12 jiohijo. Oje gemu gemu nienia ha'ose gemu gemu ëhi jioje va'ohijo. Röhu amo hesi öri börömoho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue.

²²Röhu gavodeje God rajahjarue javu börömoho bogojiamu. Bada God daruge aho'o baejë'e ahu'o hesi Sheep Harihohu'o ëho jabu bëhi maro jëvë'ego ëhuni bogo osaremuoho rajëhi'i dinö'e dinö'e God'o hesi Sheep Harihohu'o ë rajëhiruomohijo. ²³O bëhoho rabëni majahu'o manaerohu'o ë amoroho bamoromo ajivojöro. God-are ajohuro amoho ajivoromo God-are Sheep Harihohuro iro va'ëne amoho ajivajeje. ²⁴Ajivo'iramu sa'ae dinö'e dinö'e raromarue aribövioho ë amo hesi ajire jijihonövo'ë'ö. Sa'are masije riravarue ariböviohuro jabesi bövie bise'e nu ano'o mabëhe gavaruoho ë amore ujuoho rue'ë'ö. ²⁵Ëamoroho vahioho bogojio'ë'e. Majae vahie bogojio'i ma-majae jiemu jio'iramu amo rejo ojoho bogo tugohonövo jiovonövo'i ma-ëhi jiovo nugo'ë'ö. ²⁶Sa'ae dinö'e dinö'e raromarue ariböviohuro jabesi mu maho inömo maho ë amore ujuoho rueruomo'ë'e. ²⁷Va'inumi'e muoho bogo mae bogo barueruomo'ë'e. Mu sisë gö gö vaejarue aribövioho o sareri'e jö atarue aribövioho bogo ë amoroho rueruomo'i a'i mae raromemu raromo'iröhe aribövi jabesi iho Sheep Harihu hesi surire jajivo'amade ë ariböviohuremu ë amoroho rueruomo'ë'e.

22 ¹Ēhi'amu iae ë anerahuro rōjehijamu gavodeje a i'ovëvorōhe jovoho ajivo barëj'e rova'amu. Jovoho God'o hesi Sheep Harihohu'o jabuhu arijarue rōho mare jioromo ruehijo. ²Rōho mare jioromo rueromo amore öri bōrōmo hesi ririre rova'ohijo. Jovoho ririre rova'i a i'ovëvo'irōhe ijoho ionire ionire riravobe va'ohijo. Vadune gemu gemu rōhu vae 12 12 bajoho ëhi raejajeje manaere gemu gemu. Ēijo hano hesi bëhoho sa'ae dinö'e dinö'e raromarue aribövi marëjëvo'irōhoho jiohijo. ³A'i God-hu bijönimaje bövioho bise'oho ijönöho ë dirö'oho bogojio'ë'e. God'o hesi Sheep Harihohu'o jabuhu masijo vaeromo arijarue rōho maho ë jio'ë'e. God-are mu vaejहारue ariböviohuro hu ë rajahinövo'ë'ö. ⁴Rajahiro mo hesi nu ano'oho ganövo'ë'ö. Hesi ihoho jabesi varijore jajivo'amë'e jio'ë'e. ⁵Rōhu vahioho ijönöho bogojio'ë'e. Iro hesi ajohu'o maja hesi ajohu'o ajivëvo'irōhe bëhoho bogojio'ë'e. A'i Bada God-are ajohuro ajivëvonövo'ë'e. Ajivëvo'iramu jabumëro ioro'io remu masije riravoromo öri ari'oho muebebe va'oruomo'ë'e.

Iesu ruerōhe jōhoje.

⁶Rōhu ë anerahuro uehijo: Ave jōe aho'o hejanuoho iae mae-ëjo. Bogo sareroho hōjo. Bada God hesi Aru'aho a jabesi simanore bamëhego ae jō majëhijarue aho God-ro hesi aneraho na remö'öjade hōjo naro rueromo rōjëhijego hesi mu vaejहारue ariböviohuro garomo uvo'irarijego: God-ro nimo'ego majae ijönöho ëhi ëhi jië'e muohuro nosi örire rue'ie'ajëjo. Ēhi uehijo.

⁷Rōhu Iesuro uve: Jōe hehëjo. Na ma-burëro ö'ie'ajëjo. God-are jō bōrōmoho ave surire jajivë'e hōjo. Ēhuni ae rahu ejë'oho huë mabëhe jioruomo'ajëjo. Ēhi uve.

⁸Rōhu naehu jajivode jō hesi muoho aho'obëhe John naro heromo gavë'e jeve. Heromo ganugoromo ë mu rōjehijade aneraho naro uvene aho rōjahi'irōgoro hesi hörü'ere ague aho hijodeje. ⁹Ēhi'o'ego uehijo: Bogave ëhioho ë'iranëjo. Jaehu God-are mu vaejanue ëhi jië'e muoho vaejaje ae gemuoho jevajëjo. O jasi ö mueno'ohu'o jō God-aro baeromo majëhijaruoho o jaehu jajivanue surire jō ejaho'irōhe aribövioho jabuhu God-are mu vaejaruëhi na'o ëhi ë'aje ae gemuoho jevajëjo. Ēhuni nadi na rajehi'i God gemu rajahijëjo. ¹⁰Ēhi uenugoromo uehijo: Ijonö jiorōhe mu hesi jō ave suri surire jajivanuoho nadi subivëhonëjo ë hesi majaho dunovë'e jiaje. ¹¹Ae rahu mu sisë vaejaruoho ëhi vaemu vaebe va'oruomo'ajëjo. Ae rahu va'inumi'e mu uehorovaruoho ëhi uehorovemu uehorovobe va'oruomo'ajëjo. Ae rahu mu ma vaejaruoho ëhi vaemu vaebe va'oruomo'ajëjo. Ae rahu God gemu uehorovaruoho ëhi uehorovemu uehorovobe va'oruomo'ajëjo.

¹²Rōhu Iesuro uve: Jōe hehëjo. Na ma-burëro ö'ie'ajëjo. Jemesi mu hesi suvuoroho ujuohoromo ö'ejëjo mu diehi diehi mae o bisemu sisë'i

sisë'i vaejarijëhi ae gö gö suvuoroho ëhi bövie o bise'e bojëmi'irodëni. ¹³Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Na aevo'i jevadoho röhu ijönö jevo'ajëjo. Mue aho'o aevodoho ëhi vae barë'irodoho jevajëjo.

¹⁴Ae rahu niögu u'o'amaruoho huë mabëhe jioruomajëjo. Ëhi jië'e aribövioho naro uë'iramu a i'ovëvo'iröhe ijo hesi bajoho iromo amo rejo hesi ojoho ruahoromo amo börömore rueruomo'ajëjo. ¹⁵A'i mu sisë gö gö vaejarue aribövioho iro oso'e vaejarue aribövioho önö'e jijiharue aribövioho a muo'amarue aribövioho inömo sisë aru'aho'e höromo uvene aho röjahi'amarue aribövioho sareri'e mu nimoromo vaejarue aribövioho ëhi jië'e aribövioho ave amoroho bogo rueruomo'i ma-rori'o jioruomo'ajëjo.

¹⁶Iesu naro nasi aneraho nugö'öjë'e jevajëjo ë jöho huruoho majëhijego ekaresiae gö gö he'irarijego. Na a böröme David-are ujoho jevajëjo. Sionuvego ajivaje mujöroho va'ëne jevajëjo. Iesuro ëhi uve.

¹⁷Röhu God-are Aru'ahohu'o Sheep Harihehu i'e masuvade magonahohu'o jaburo niö'iro uvö: Ruehëjo. O ave jö he'irarije aribövioho jemë'o uvore: Ruehëjo. O ae rahu huë girihëvë'oho jemëro ruehe. Nimë'oho rueromo a i'ovëvo'iröhe jovoho ma-ire. Manaho bogojio'ë'e.

Ijo tugoho'i jöhoje.

¹⁸Röhu John naro God-are jö börömoho ave surire jajivë'e jeve. Ëhuni naehu jajivode jö he'irarije ariböviohumë ave jö majëhi'ie'ajoho avoho here. Naehu jajivode jöho ae rahu gö'o döre ëma jajivë'oho ave surire jajivode i'uoho God-ro ë aho bojami'ë'e. ¹⁹O ae rahu uvë'oho: John-hu jajivade jö ë hesi vituoho sisë höromo dodure bu'öjë'oho God-ro uvo'ë'e: Ëhi jië'e aho sisë höromo dodure bu'ö'ë'e. Dodure bu'ö'iramu ave surire jajivode a i'ovëvo'iröhe ijo bajoho bogo i'ë'e. O ave surire jajivode God-are amo börömoroho bogo va'ë'e.

²⁰John naehu jajivode jö mae hö uvaje Ahuro uve: Iae na ma-burëro ö'ie'ajëjo. Bada Iesu iae mae uvanue. De je rove.

²¹Bada Iesuro jemë aho'o huë baeromo ajëminövo'ë'e. Ahia mino'e.